


MGA PANGUTANA UG MGA TUBAG MGA HEBREOHANON

BAHIN II

 Gusto ko unang pasalamatang ang matag usa sa inyo nga nakadawat sa mensahe nga “iampo ang akong asawa.” Grabe gyud kaayo ang iyang, gibati niadto. Wala mi kahibalo kung naunsa, ug wala pud mi kahibalo kung unsa gyu’y nahitabo, basta nagsuka siya og ayo ug halos wala na’y panimuot, ug may hilanat nga mga usa ka gatus ug lima ang kainiton, mao nga gikinahanglan niyang mapahid-pahiran og yelo nga nakaputos sa panapton. Busa . . . pero okey na siya karon. Nawala na ang hilanat, ug okey na siya. Pero luya pa kaayo siya, miniwang gud siya og mga napulo ka libra, sa tanaw ko. Wala pa siya . . . Karong gabhiona lang siya nakatulon-tulon og pagkaon sukad niadtong Dominggo. Ug tungod nga grabe man gud ang iyang gibati, ug nagsalig kami sa Ginoo para kaniya, ug giayo gyud Niya siya. Karon buot namong sultihan kamo nga magpadayon gihapon sa pag-ampo nga unta makabawi-bawi na siya pag-usab sa iyang kusog.

³⁰⁴ Ug bueno, sa niining moabot nga katapusan sa semana, kon itugot sa Ginoo, gikinahanglan kong moadto sa Miami. Ang suod kong higala, nga si Igsoong Bosworth, Mopauli na man gud, ug siya’y halos usa ka gatus anyos na karon. Ug iya kong gitawgan, ingon siya, “Igsoong Branham, umanhi ka ug duawa ako sa gilayon, aduna ko’y gustong isulti kanimo sa dili pa ako motaliwan.” Ug siya . . . Bueno, sa hunahuna ko gusto niya nga iampo ako, ug ipandong ang iyang mga kamot nganhi sa ako sa dili pa siya motaliwan, kabalo mo.

³⁰⁵ Ug ako—nagalaum ako nga matapos pud unta ang akong mga adlaw nga may dungog nga sama kang F.F. Bosworth. Sa tanang kalalaken-an nga akong nailhan dinhi sa kalibutan, sa matag tawo nga akong nahimamat dinhi sa kalibutan, wala pa ko nakahimamat og tawo nga gipangandoy gayud nako nga mahisama sa iyaha, sama ni F.F. Bosworth; ingon nga—ingon nga usa ka ministro, ang buot kong ipasabot. Sukad-sukad wala pa ko’y nadungog nga usa ka tawo, sa tibuok kalibutan, sa bisan asa man, nga naghimo og usa ka pahayag mahitungod kang F.F. Bosworth kondili ang ginaingon ra mismo nga siya sa tanang bahin “usa gayud ka Cristohanon,” ug sa tanang bahin “usa ka tinuod nga igsoon.”

306 “Tungod sa ilang pagtaliwan kanato gibilin ang ilang mga tunob diha sa kabalasan sa panahon.” Usa siya ka talagsaon nga igsoon, ug siya’y tigulang na gayud karon, halos usa ka gatus na. Mao nga siya—siya Mopauli na, kana lang, ug iya akong gisultihan. Nasayod man siya nga motaliwan na siya, ug nagahulat na lang. Miingon siya nga karon kono ang pinakamaanindot nga panahon sa iyang kinabuhi kining higayona mismo nga nagahulat na lang siya, ug miingon sab nga nasayod siya nga motaliwan na siya.

307 Ingon ko, “Moadto man unta ko sa Michigan niining semanaha, Igsoong Bosworth.”

308 Ug ingon siya, “Bueno, ayaw na kaayo paglangan, Igsoong Branham, dili na baya ko magdugay. Nagakaluya ug nagakaluya na ko.”

309 Bueno siya’y higala gayud nako, mao nga dili mahimo nga dili ko moadto. Karon, kung kinahanglan kong mosakay og eroplano, nan ako—mosakay gihapon ko pabalik ug siguro makabalik na para sa Dominggo sa gabii; kung dili man, bueno, basin magdrayb ra ko, ug tingali’g madugay-dugay pud lagi.

310 Ug iampo n’yo si Igsoong Bosworth. Iampo n’yo nga ang Dios...ug pag kuhaon na Niya ang tigulang nga patriarca, magpadala unta Siya og usa ka carro nga kalayo ug kuhaon siya, kita n’yo. Gihigugma ko siya, nahimo siya nga mora’g papa na nako.

311 May usa pa ka tigulang nga lalaki...siya ug si Igsoong Seward. Ako—medyo nagadapig ako sa mga katigulangan, og gihigugma ko—ko sila. Ug ang tigulang nga si Igsoong Seward, natulog ra siya nga ingon niana, usab. Hinoon, si Igsoong Seward dili man siya ingon gyud ka tigulang, sa hunahuna ko, sama ni Igsoong Bosworth.

312 Ug iampo n’yo si Igsoong Bosworth. Dili man gud puro rosa ang tanan sa maong dapit, kondili mao’y—mao’y... Gikinahanglan niya ang inyong mga pag-ampo, pero dili gyud ingon nga para sa kung unsa pa man kondili para lang sa iyang...nga itugot unta sa Dios nga motaliwan siya nga malinawon.

313 Karon...Ug buot natong hinumduman, usab, nga ugma, kon itugot sa Ginoo, igoalubong nato ang usa sa atong mga higala dinhi niining iglesia, si Igsoong Sol Coates. Makadaghang higayon na pud nga nakatambong siya dinhi, og nagtrabaho siya sa opisina sa koreyo sulod sa daghang mga tuig. Ug namatay siya sa Veterans Hospital niadtong miaging gabii. Nangadto mi ni Igsoong Cox para duawon siya, ug siya’y...nagluya na gayud. Ug karon mitaliwan na siya, nga usa ka Cristohanon. Ug igoalubong nato siya gikan sa Coats’ Funeral Home ugma sa hapon sa ala una, kami ni Igsoong Neville. Magaawit ang Neville trio; ug bahinon namo ang mga buluhaton, kami ni

Igsoong Neville. Pero kana, wala pa ko kabalo kung kanus-a namo himoon ang mga angay'ng andamon, tungod pud sa kahimtang ni Meda. Ug, bueno, ang iyang lubong ugma na sa hapon sa ala una, sa Coots' Funeral Home.

³¹⁴ Ug pagkahuman, sa alas dos, sa Biyernes, si Mr. Wheeler na pud. Pod Wheeler ang tawag namo sa iyaha; siya'y usa ka, nakalimot na ko kung unsa ang tinuod niyang. . . Ug, kabalo mo, ako—nabasa nako sa mantalaan ug wala lang ko nakaila dayon kung kinsa, hangtud nga ako nang nahibaloan mismo. Silingan namo siya sulod sa daghang mga tuig, ug—ug bag-ohay lang siyang namatay. Ngani dinhi pa siya sa atubangan sa simbahan, niadtong miaging gabii, ug gisulayan kong awhagon siya nga mosimba. Niadtong miaging gabii, mga tulo na ka semana diay ang milabay, nagtindog siya dinha, ug gisulayan kong aghaton siya nga mosimba. Tungod kay, sa hunahuna ko wala man siya nagasimba ni adunay unsa man nga matang sa pagpamahayag, pero aduna siya'y anak nga usa ka magwawali sa Baptist. Pero wala siya nagapamahayag og unsa man kutob sa nasayran ko, ug karon mitaliwan na siya aron tagboon ang Dios. Busa Biyernes sa hapon na kana sa alas dos didto sa Coots' Funeral Home. Ug usab, magaaawit gihapon sila ni Igsoong Neville, sa maong paglubong.

³¹⁵ Ug busa, kung aduna man kaninyo nga gustong motambong sa mga buluhaton, ugma na kana sa alas dos, o, ugma sa ala una. Nagatoo ko nga husto kana. Dili ba, igsoon? Sa alas dos diay, ang usa pa ka paglubong. Husto ba? Alas dos, didto sa Coots' Funeral Home.

³¹⁶ Ug karong, Dominggo sa buntag. . . Sabado na tuod ang pagpasibya. Ug ipahibalo man tingali ni Igsoong Neville sa inyo, nianang adlawa, kung unsa. . . kung makapahigayon ba tà og panerbisyo sa pagpang-ayo sa Dominggo sa gabii, o kung unsang orasa kami makabalik kung mobiyahe ako paingon—paingon sa Florida para duawon si Igsoong Bosworth. Wala gani ako mahibalo kung unsaon ko sa pagpanamilit kaniya, tungod nga siya'y minahal gayud nga suod kong higala. Ug tingali'g mao na kana ang kaulahiang higayon nga magkitaay kami, kung, pahanugotan sa Ginoo, dinhi niining yutaa. Ug siya. . . wala ko mahibalo kung mahimo ko ba nga manamilit kaniya sa gilayon o dili; pero ayaw ko gayud unta nga manamilit sa iyaha, apan, kabalo na mo kung unsa kana, aduna man gu'y uban pang mga butang nga kinahanglan mong buhaton.

³¹⁷ Karon may usa ka pahayag nga buot kong isulti samtang dili pa ingon ka daghan ang ania dinhi, ug ania pu'y mga higala nako.

³¹⁸ Nalipay ko nga makita si Igsoong babayeng Smith dinha. Kini ang unang higayon nga makita ko siya usab sulod sa dugay nga panahon. Kumusta na ka Igsoong Smith? Usa ka tuig na,

gyud, sa hunahuna ko niadtong ulahing higayon nga nakita ta ka. . . [Nagasulti si Igsoong babayeng Smith—Ed.] Didto sa Benton Harbor, nanghinaut ko nga makaadto unta ko didto sa umaabot nga panahon. Maayo gyud. Nagatoo ko ang ulahing higayon nga nakita ta ka, didto kadto sa usa ka panerbisyo sa paglubong sa Louisville. Ug mahinumduman ko gayud si Igsoong babayeng Smith. Kami. . . ginahapit ko siya kaniadto para makasakay sa trak pag moadto kami sa simbahan. May mga uling-uling gani sa luyo niadtong trak ug ang babag sa mga ligid nagakagulkol na, ug mabugnaw kaniadto; pero ako, pinagawas pa ang usa nako ka tiil. Oh, grabe! Daghan na gayu'ng tubig ang midagayday sa suba sukad kaniadto, Igsoong babayeng Smith. Oo, mao gyud. Bueno, ginapasalamat nato ang Ginoo tungod niadtong bililhon nga mga handumanan, ug sa gihapon ginahigugma nato Siya.

³¹⁹ Usa pa ka butang, tingali'g adunay matingala, niadtong miaging gabii. . . nakig-istorya ko kang Igsoong Fleeman dinha sa may kalsada. Ug usahay adunay moingon, “Pagkahuman nga pagkahuman sa panerbisyo, nganong molakaw man dayon si Igsoong Branham?”

³²⁰ Ania kung ngano, nag-inusara ra man gud ang akong asawa didto. Kita n'yo? Ug kung makig-istorya pa ko, basin man gud og maabtan na ako og tungang gabii sa pagpakig-istorya, ug samtang atua siya, nga nag-inusara ra sulod sa hataas nga oras. Ug mao kana'y hinungdan nga nagadalidali ko, aron makabalik dayon sa iyaha, nakita n'yo, inig magabii; tungod kay pag makasugod na ko sa pagpakig-istorya, dugay man gud kaayo kong makig-istorya. Makig-istorya gud ko sa *niining* usa sulod sa tunga sa oras. Dili man nako mahimo nga molabay ra ug moingon, “Kumusta man *ka* karong gabhiona? Kumusta man *ka*? Kumusta man *ka*?” Dili ingon-ana ang akong ginabuhat. Kondili mohunong gyud ko ug makig-istorya usa; ug pag aduna pu'y maghisgot mahitungod sa kung unsa man, nan maabtan gyud ko og usa ka oras. Kita n'yo? Ug mao kana kon ngano, ang akong asawa man gud atua na didto nga nagahulat ug ingon niana. Ug mao ra kana'y hinungdan. Ayaw kong maghunahuna kamo nga dili ko gustong makighimamat sa akong mga higala ug makiglamano kanila, ug ipahayag ang among pagpakig-fellowship ug uban pa, pero tungod ra man gud kini nianang kahimtang.

³²¹ Bueno, karon, mag-ampo ang matag usa para sa mga may sakit ug sa mga nagaantus.

³²² Ug si Mrs. Harvey diay anaa gayud sa kalisdanan, pero okey-okey na kono siya. Oo, sir. Ug wala nako makita. . . ako. . . Karon tingali'g aniay usa, dinhi, kutob sa nasayran ko, nga usa ka doktor. Ug kung sayup man ako sa ibabaw niining entablado, pasayloon unta ko sa Dios. Pero nagatoo ko nga papanubagon gyud sa Dios ang mga doktor tungod sa ilang gibuhat sa maong

babaye. Ako—nagatoo man ko sa pag-opera, nagatoo ko sa mga medisina. Tinuod, nagatoo ako. Nagatoo ko nga gipadala sila dinhi sa Dios aron makatabang kanato, sama sa gipadala Niya ang mga mekaniko para sa mga sakyanan ug uban pa. Pero kadtong luoy'ng babaye, gipahigda lang siya sa doktor, ug ang ingon, “Puno na siya og kanser, og wala na gyu'y mahimo pa.” Ang luoy'ng inahan daghan baya intawon og mga anak.

³²³ Giadtoan ko siya, ug akong gisaysay sa iyaha kung unsa nga pinaagi sa pag-ampo. . . Ug—ug siya'y batan-on pa nga babaye, mga baynte-singko pa lang. Ug giayo sa Dios kaniadto ang iyang gamay'ng bata, nga gitawag og “milagro nga bata” didto sa ospital sa mga bata, tungod nga naayo man sa meningitis. Ug grabe na kaayo ang kahimtang sa—sa maong bata, pero giayo dayon siya sa Ginoo. Sila, ang mga doktor, wala gud nila mahisabti kadto. Giadtoan ko si Mrs. Harvey, ug ingon ko, “Karon, Mrs. Harvey, misurender na diay ang mga doktor sa imoha?”

³²⁴ “Oo, sir. Tungod. . .”

³²⁵ Ug miingon ang iyang bana, “Oo, wala na gyud kono'y mahimo pa, tungod siya'y bug-os gayud kono nga napuno na og kanser.”

³²⁶ Ingon ko, “Bueno, karon ang tinguhaon natong buhaton, mao ang toohan ang Dios, nga ayohon sa—sa Dios ang. . . ayohon ka.” Ug ingon ko, “Ingon-ani ang mahitabo, ang kanser tingali'g dili dayon mawala; pero kung mag-ampo kita, nan mawala gayud ang kinabuhi sa kanser. Tingali'g grabe gihapon ang imong pamati sa hamubo nga panahon, ug—ug” ingon ko “mahimo pud nga makabati ka og alibyo sa gilayon.” Ug ingon ko, “Dayon human sa pila ka adlaw tingali'g mas mograbe pa ang imong pamati.” Pero ingon ko, “Mao nga kinahanglan mo gayu'ng ipahimutang ang imong pagtoo batok nianang kanser.” Ingon pa ko, “Kung mabuhi man gud ang kanser, nan mamatay gyud ka. Pero kung mamatay ang kanser, nan mabuhi ka.” Ug ingon ko, “Karon mag-ampo kita.”

³²⁷ Ug nag-ampo kami, ug sa matag panghimatuod nga akong nakita, gihikap gyud sa Dios ang lawas niadtong babaye. Ug sa gilayon maayo na ang iyang pamati, ngani miadto siya para duawon ang akong inahan, mibisita pud siya sa mga silingan, (sa dihang atua siya niadtong dili maayong kahimtang) ug niadtong wala siya'y gibati nga sakit. Dayon mga tulo ka adlaw human niadto nagsakit na usab siya.

³²⁸ Ug unya nahibaloan ko nga miingon ang siyudad nga sila kono “ang mobayad sa balayronon para sa doktor, kung operahan nila siya.”

³²⁹ Ug karon kung sayup man ko, pasayloon unta ako sa Dios. Pero gioperahan nila kadtong batan-ong inahan, ingon nga “guinea pig” ang gihimo kaniya. Gioperahan nila siya didto,

ug gihabwa nila ang iyang mga tinae gikan sa iyang tiyan, ug tanan na. Gihabwa ang para sa agianan sa ihi ug agianan sa tai, ug gihabwa kadto gikan sa isig ka kilid sa tiyan. Ug atua siya sa pang-operahanan nga lamesa sulod sa siyam ka oras kapin. Ang ingon sa nars, “Mora kono kadto og sama sa ihawanan, kon diin ilang gihabwa ang iyang mga tinae gikan sa usa ka bahin ngadto sa usa pa ka bahin, ug nagbutang og mga plastik nga obaryo ug mga plastik nga tubo.” Diretsahan kana, pero mao kana’y tinuod. Ug may plastik pud nga mga tinae ug mga ingon-anang butang, ug gipasagdan nila ang babaye nga nagahigda nga ingon-adto ang kahimtang, usa ka luoy’ng inahan. Makaingon ko, sa paghunahuna ko niini, kadto nga mga doktor sad-an gyud sa pagpatay.

³³⁰ Giingnan sila sa babaye, ingon ang babaye, “Si Igsoong Branham nag-ampo na man para sa ako.” Ug ingon pa, “Nagatoo kami nga ang kanser . . . nga patay na ang kanser.”

³³¹ Pero miingon, “Aduna ko’y balita sa imoha, ‘Buhi pa ang imong kanser.’”

³³² Giunsa man niya pagkahibalo niadto? Nga anaa man kadto sa sulod, dili gani kana makita sa x-ray. Ang kanser man gud. . . Dili n’yo makita ang kanser pinaagi sa x-ray, tungod unod man kana mismo, mao nga dili n’yo makita kana. Adunay usa lamang ka butang nga mahimong buhaton, operahan ang babaye ug hiwaan siya. Kana lang. Bueno ingon nga usa siya ka luoy’ng inahan, kung sa ako lang gipasagdan ko na lang unta siya nga sulayan niya ang iyang pagtoo sa Dios imbes nga himoon siyang “guinea pig” nga sama niana. Karon kung ako—kung sayup man ko, kung ako—kung sayup man ang akong motibo, gusto kong pasayloon ako sa Dios, nakita n’yo. Tungod ayaw ko untang hunahunaon n’yo nga wala ako nagatoo sa mga pag-opera o wala ako nagatoo sa mga doktor ug mga ingon-anang butang. Maayo man kana. Pero sa tan-aw ko angay unta nga hibalaon gyud ninyo una ang inyong pagabuhaton adisir n’yo operahan ang usa ka tawo, dili nga mora’g eksperimentohan lang sila nga sama niadto. Husto. Ug karon, siyempre, mahimong dili na siya mabuhi. Mao gyud. Kung mabuhi man siya, nan usa gayud kana sa pinakadakung mga milagro nga mahitabo. Ngani sa dihang gitan-aw sa maong babaye ug nakita niya ang iyang mga tinae nga anaa na sa usa ka kilid, ug ang iyang mga kidney anaa pud sa pikas kilid, nakuyapan gyud siya nga nakaingon *niini*, nakuyapan. . . Aba, dili ra kadto. . . wala na gyud ang luoy’ng babaye. Ug siya’y mga baynte-dos o baynte-singko anyos pa lang nga luoy’ng inahan nga dunay tulo o upat ka gagmay’ng mga bata nga pagaamumahon. Pinakasubo nga butang nga nadungog ko sa tibuok kong kinabuhi. Ingon ko, “Sa tan-aw ko niini, sad-an gyud ang doktor tungod sa. . .” Kung gigamit niya ang maong babaye ingon nga usa ka pang-eksperimento tungod lang kay ang siyudad mao’y mobayad para niini, kung ingon-ana sayup

kana, og dili gayud angay'ng mapahanugotan.

³³³ [Nangutana ang igsoong lalaki kung mahimo ba nga mapabalik sa Dios ang maong babaye—Ed.] Bueno, sultihan ta ka, igsoon, dili kana imposible. Ug kana'y—dili kana. . . Kana'y—posible kana, ug mamahimo usab. Tungod duna ko'y nailhan nga usa ka lalaki nga putol na ang usa ka bukton, didto sa California (kamong tanan nabasa man ninyo kini mismo sa mantalaan), og naiampo ang lalaki, ug putol *kadto* nga bukton hangtud *dinhi*, pero mitubo kadto hangtud nga aduna na'y nagatubo sab nga mga tudlo; apil na ang siko, ang pulsohan, ang kamot, ug ang bahin usab sa mga buko-buko sa luyo sa mga tudlo, nakita n'yo. Ginamantala kana, nagatoo ko, sa *Herald of Faith* kada bulan. Gituyhod pa gani niya ang iyang mga kamot nga nakaingon *niini*, og gipakita kon diin ang bukton niya putol kaniadto, og mitubo na kini. Kung unsa nga padayon kadto nagatubo kada bulan, sulod sa halos usa na ka tuig.

³³⁴ [Nagasulti pag-usab ang igsoong lalaki—Ed.] Tinuod, husto kana. Nagatoo ko. . . Kana—kana—talagsaon ra kana, kita n'yo, kana'y talagsaon ra kaayo. Pero usahay may madungog ako mahitungod sa mga ingon niana. Ngani, si Igsoong Bosworth, may giampo pud siya nga usa ka babaye usa niadto ka gabii. Ug nakasaksi na pud ko og ingon-ana sa akong panagtigum. Pero kadtong sa kang Igsoong Bosworth diha-diha dayon kadto; ang sa ako medyo nadugay-dugay pa kadto adisir nahitabo.

³³⁵ Giampo niya ang usa ka babaye. . . Bueno, nabasa ko gani ang testimonyo niadtong babaye. Aduna siya'y kanser, wala na siya'y ilong; giut-ot na man gud ang iyang ilong. Pero pagkasunod buntag nagkaaduna na og ilong ang babaye. Karon, nasayod ko niini. . . Karon, kana'y sa kang Igsoong Bosworth, diha sa iyang libro nga may ulohan nga *Christ The Healer*, sa hunahuna ko, o, *The Joy Bringer*, usa niana. Bueno, anaa dinha ang testimonyo niadtong babaye, lakip na ang iyang ngalan ug kung asa siya nagapuyo. Ug aduna siya'y mga silingan ug mga doktor ug tanan na nga makapamatuod niana, nga nahitabo gyud kana.

³³⁶ Bueno, didto pud sa Little Rock, Arkansas, usa ka gabii sulod sa usa ka lawak, nag-ampo ako didto. . . dili diay sa Little Rock, kondili sa Jonesboro. Nag-ampo ako niadto. . . ingon ko, “Magpabilin ako hangtud nga maiampo ko ang ulahing tawo.” Walo ka adlaw ug gabii ako nga anaa niadtong entablado, kita n'yo. Ug pagkahuman. . . ug didto sa may lawak dunay usa ka babaye nga miduol, nakatabon ang iyang panyo nga nakaingon *niini*, ug abi ko'g nagahilak siya. Ug ingon ko. . . Oh, siguro mga alas dos o alas tres na kadto sa buntag, ingon ko, “Ayaw paghilak, igsoong babaye, Mananambal ang Dios.”

³³⁷ Ingon siya, “Wala ko nagahilak, Igsoong Branham.” Gitanggal sa babaye ang panyo; wala na diay siya'y ilong, kita

n'yo. Ang ingon sa mga doktor. . . Giut-ot na kono sa kanser hangtud ang puti nga bukog sa iyang. . . makita na gani kadto. Ug nag-ampo ako para sa babaye, ug nangamuyo sa Ginoo nga ayohon siya.

³³⁸ Ug mga upat o lima ka semana gikan niadto, atua ako didto sa Texarkana. Ug may usa ka lalaki didto nga maanindot-og-binistihan, ingon siya, “Mahimo ba nga maistorya tà ka kadali, Igsoong Branham?”

³³⁹ Ngani sa pagsaka niya sa entablado, usa sa mga usher ang misulay unta sa pagpahilum kaniya. Miingon ko, “Bueno, atong tan-awon.”

³⁴⁰ Ingon siya, “Nakaila ka pa ba niining batan-ong gining?”

³⁴¹ Miingon ko, “Wala, wala ko nakaila.”

³⁴² Miingon siya, “Kung tan-awon mo kini nga retrato nan mailhan gyud nimo siya.” Ug ang maong lalaki usa siya ka tigpuo og mga insekto didto—didto sa Texarkana, ug iya diay kadtong inahan ang aduna na’y bag-ong ilong nga mitubo, nga ang porma sama gyud mismo sa uban pa.

³⁴³ Karon nagapakita lang kana nga ang Dios. . . nakasaksi na ko mismo og ingon-ana nga nahitabo. Mao nga, mahimo gyud kana sa Dios para sa luoy’ng si Mrs. Harvey. Ug ginaampo ko nga buhaton gyud Niya, ingon nga ginatinguha gyud sa luoy’ng babaye nga mabuhi pa.

³⁴⁴ Igsoong Tony, aduna ka ba’y isulti?

[May ginabalita nga pagpang-ayo si Igsoong Tony—Ed.]
Tinuod kana.

Amen. Amen. Oo, maayo kana, usab. Oo, buhaton gayud Niya, Siya’y usa man ka Mananambal.

[Nagapakig-istorya ang usa ka igsoong lalaki ngadto kang Igsoong Branham—Ed.] Oo. Oo. Oo, igsoon. Amen. Tinuod. Oo.

³⁴⁵ Sigurado ko. . . Bueno, nagalaum ako nga igabalik kana sa Dios kanimo, anak, mahimo mong dalhon kana’g balik ug ipakita sa iyaha. Eksakto gayud. Usa kana ka testimonyo alang sa kahimayaan sa Dios, og ginaampo ko nga buhaton kana sa Dios. Oh, Siya—Siya. . . Kung Siya’y Dios nga Makagagahum-sa-tanan, nan mahimo Niya ang tanang mga butang. Kung dili man Niya mahimo, ang tanang mga butang, nan dili Siya Dios nga Makagagahum-sa-tanan.

³⁴⁶ Aduna gayu’y nagbuhat kanato sa kung unsa kita, sa kung unsa mismo kita, kay kon wala nan aduna unta kita og—og ulo nga sama sa usa ka langgam, o mora’g ingon niana, kung walay usa ka Maalamon sa luyo nato nga nagbuhat sa matag usa kanato nga may panagway, og nga nagbuhat sa kahoy’ng encina, sa kahoy’ng poplar, sa kahoy’ng palmera, ug—ug gihimong managlahi kini sa kung unsa—kung unsa ang mga niini. Wala

kita gibuhat nga may . . . ang uban adunay mga balhibo, ug ang uban adunay mga pako, ug ang uban pud adunay mga panit, aron kamo . . . Kita n'yo, may—may usa gyud ka Maalamon sa luyo niana, nga—nga nagadumala niana. Siyempre anaa man Kaniya ang tanang mga butang diha sa Iyang mga kamot. Ug nasayod ako nga mahimo gyud Niya ang tanang mga butang. Ug igaampo nato kana, magaampo kita.

³⁴⁷ [Nagapakig-istorya ang usa pa ka igsoong lalaki ngadto kang Igsoong Branham—Ed.] Husto. Aduna kita'y . . .

³⁴⁸ [Nagaingon si Igsoong babayeng Snyder, “Igsoong Billy, pasensya na.”—Ed.] Oo, ma'am, okey lang, ipadayon mo. [Ginabalita ni Igsoong babayeng Snyder nga naayo siya kaniadtong nag-ampo si Igsoong Branham para kaniya niadtong miaging Dominggo.] Amen. Abi nimo, nahunahuna baya nako, Igsoong babayeng Snyder, usa ka higayon niadtong nagatindog ko dinhi nga anaa sa pagdihog, nahunahuna ko . . . akong giingnan si Igsoong Cox, ingon ko, “Dili ko na sulayan nga magkaaduna pa og mga pagpang-ila nga panagtigum didto sa tabernakulo.” Oh, wala lang ka mahibalo kung ginaunsa ako paghasol sa yawa, igsoon babaye. Ginabuhat gyud—gyud niya kana! Kabalo mo, ginasultihan niya ako og kung unsa na lang bahin sa niining mga pagpang-ila.

³⁴⁹ Ug dinhi, nahibaloan ko nga ang igsoong babaye ni Mrs. Wood dinhi . . . wala ko pa sukad nakita ang kinsa man sa ilang mga paryente. Pipila kanila ang naayo niadtong higayona, ug ang tanan . . . Bueno, kabalo mo, dakung porsyento niadto nga mga tawo ang nangaayo. Ug human sa . . . Ania ang makahibulongan nga butang: ang iyang igsoong babaye, nakauban ko diay siya sa pagpanihapon usa niadto ka gabii, nga duha ka semana sa wala pa kadto, . . . Oh, didto kadto sa kabukiran sa Kentucky, ug ako—kabalo ko nga ang iyang tingog sama sa kang Mrs. Wood, ug dili pud ingon ka hayag didto sa maong lawak. Ug daw sa wala lang nako siya natagad, niadto, tungod mas nakig-istorya man ko sa iyang bana, og nagaandam man pud siya sa panihapon niadto. Ug migawas na kami ug nanglingkod ug nangaon; ug misulod og balik didto, nakig-istorya ko sa iyang bana, unya mitindog na ko ug milakaw na. Ug nasayod gyud ang Dios nga mao'y akong matinud-anong Maghuhukom (nga ania mismo dinhi sa pulpito) nga wala ko naila ang maong babaye.

³⁵⁰ Ug dayon human nga natapos na ang panerbisyo sa pagpang-ayo, nagpahigayon ko og usa ka pagtawag sa altar para sa mga makasasala nga maghinulsol. Ug dugay na siyang nagmapahitas-on batok Niini; pero naghinulsol siya ug gitugyan ang iyang kinabuhi ngadto kang Cristo, gipataas ang iyang kamot ingon nga ginsurender niya ang iyang kinabuhi ngadto kang Cristo, ug nagahilak siya. Pagkahuman nga nawala na ang pagdihog, nagpahigayon ko og pagtawag sa altar, ug ingon

niana. Ug unya nahitabo nga mibiyo ako, ug ania ang usa ka panan-awon, ug nakita ko ang iyang igsoong lalaki; niining igsoong babaye, igsoon sa maong lalaki kining igsoong babaye, ug magkauban sila.

³⁵¹ Ug abi ko'g asawa kini ni Charlie, tungod kay sa nahibaloan ko nga atua sa may lamesa niadtong miaging adlaw, didto sa—sa balay ni Charlie. . . Ang iyang asawa, nga luoy'ng babaye, gipakita kanako sa Ginoo ang sakit niya. Ug niadtong orasa mismo, gihikap sa Ginoo ang iyang lawas, samtang atua siya didto sa lamesa. Si Tony, atua kami niadto, didtong dapita, nangayam og squirrel. Ug gihikap sa Ginoo ang iyang lawas ug giwagtang kadtong butang nga kinahanglan niyang sul-obon sa tibuk. . . sa tibuk niyang kinabuhi, giwala na kadto sa iyaha; samtang atua didto. Ug ang luoy'ng babaye sa kanunay didto gyud siya nagakaon dapit sa may tumoy sa lamesa, pero niadtong adlaw, miduol siya mismo, ug gibalhin ang iyang lingkoranan, ug mikaon tupad nako. Wala siya nahibalo niadto sa iyang ginabuhat. Ngani ang iyang bana atua man nagalingkod nga nakaingon *niini*, ug nagalingkod pud didto si Igsoong Banks, ug nag-istoryahanay kami. Ug misibog siya, ug gibalhin ang iyang lingkoranan, ug milingkod didto tupad nako. Ug alang diay kadto sa usa ka katuyoan, nagpakita ang Ginoo og usa ka panan-awon niadtong tungora mismo. Ug gitawag ko ang iyang bana didto, tungod kay sakit man kadto nga iya sa babaye, hinay-hinay kong gisulti sa maong bana kung unsay nahitabo. Ingon niya, "Igsoong Branham, ingon niana gyud ang nahitabo, ingon niana mismo." Ug didto gisultihan pud niya ang iyang asawa, ug giayo sa Ginoo ang maong babaye. Oo.

³⁵² Ug usab human nga natapos ang panerbisyo niadtong miaging gabii, ug kining usa pa ka igsoong babaye, nakita ko nga magkauban kining batan-ong Charles ug kining babaye. Sa hunahuna ko, "Basin iyang asawa kana; pero bulagaw man ang iyang asawa, ug itum man ang buhok sa niimi nga babaye." Ug akong namatikdan nga mipaingon ang panan-awon dinhi dapit sa kanto. Ug nagalingkod dinha ang maong babaye nga ginapahiran ang iyang mga luha ug nagpakita og panan-awon ang Ginoo human nga ang babaye. . . sa pagtawag sa altar. . . human nga natapos ang panagtigum sa pag-ampo, ang pagpang-ayo sa mga may sakit, ug nahimo na ang pagtawag sa altar, ug naghulat pa ang Dios hangtud nga naghinulsol siya ug gitugyan ang iyang kinabuhi ngadto Kaniya ug dayon mibiyo ug giayo siya. Ug aduna siya'y. . . nanghupong gyud siya tungod sa iyang sakit sulod sa daghang mga tuig. Dayon mikuyos siya, ug tanan na, nangunot gud ang iyang mga tiil tungod nga nanggawas na man sa iyaha (ang mga hilo) nga gikan sa iyang lawas. Miarang-arang na iyang paminaw kumpara sa ginabati niya sulod sa daghang mga tuig, kita n'yo. Ug gibuhat gayud kadto sa Dios pinaagi sa Iyang makahibulongang grasya! Nagatoo ko

nga mao kana mismo ang estorya; dili ba, Igsoong babayeng Wood? Ug nagapahumat gayud Siya! Human... Unsay sulti niya? [Nagaingon si Igsoong babayeng Wood, “Miniwang siya og pito ka libra niadtong miaging semana.”—Ed.] Pito ka libra sulod ra sa usa ka semana. Oh, Dios gyud Siya, dili Ba?

³⁵³ Karon, isulti ko kaninyo, ang hinungdan nga misulti ko kang Igsoong Neville... Nahunahuna nako nga tingali'g aduna siya'y mensahe para karong gabhiona. Miingon siya, “Wala,” wala kono siya'y mensahe. Ug aduna pa ko'y mga pangutana dinhi nga nahibilin, mao nga obligado gyud ko nga moanhi dinhi ug tubagon kini nga mga pangutana. Dayon aduna na lang og duha o tulo nga tingali'g dili na nako mahisgotan karong gabhiona.

³⁵⁴ Pero buot kong ipakita kaninyo ang pipila nga gitunol dinhi gikan sa usa ka magwawali. Si Igsoong Neville, o, si Beeler ang nagtunol niini sa ako. [Ginatubag ni Igsoong Branham ang mosunod nga walo ka pangutana diha sa Bahin III, ingon nga mga pangutana numero 67 hangtud 74—Ed.]

Unsa ba ang ginarepresentar sa mga bato diha sa Pinadayag 21:19 ug 20?

Isaysay ang upat ka mga mananap diha sa Pinadayag 5...
Ang buot niyang ipasabot 6; dili kana sa Pinadayag 5, sa 6 kana, nagatoo ko.

Ug si kinsa ba ang kaluhaan ug upat ka mga anciano?

Unsa ba ang buot ipasabot sa pula nga tanod diha sa Genesis 38?

Asa ba ang mga gasa nga igapadala pag namatay na ang duha ka mga saksi, diha sa Pinadayag 11?

Asa man mahiadto ang mga balaan human sa usa-ka-libo-ka-tuig nga paghari? Ug unsa man nga matang sa lawas ang ilang mabatonan?

Sa unsa mang paagi nato pagahukman ang mga manulonda?

Unsa man ang buhok nga ginapahinungod sa mga manulonda diha sa Unang Mga Taga-Corinto?

³⁵⁵ Kung hisgotan lang ang maanindot nga mga pangutana, kini'y mga maanindot gyud nga pangutana. Tingali'g dili na ko makadangat sa mga niini karong gabhiona, pero kung itugot sa Ginoo, paningkamotan kong tubagon kini sa sunod higayon nga manganhi kita.

³⁵⁶ Aduna ko'y nadawat dinhi nga maanindot nga mga pangutana karong gabhiona; busa mag-ampo kita karon ug mangamuyo sa Ginoo nga tabangan kita, ug hisgotan na dayon nato ang mga niini sulod sa, oh, traynta'y-singko, kuwarenta minutos.

³⁵⁷ Karon, mapanalanginong Langitnong Amahan, mapasalamaton kami Kanimo alang sa tanan nga Imong gibuhat

para kanamo. Ug, oh, makahibulongan gayud nga ang Imong grasya miabot kanamo. Naghunahuna ko karon, bahin niadtong miaging gabii, nga ang akong luoy'ng asawa, oh, grabe gyud ang gibati, pero miabot Ka sa esena. Hinay-hinay nga mihuwas ang iyang hilanat niadtong orasa mismo, ug siya'y bug-os gayud nga naulian na karon. Mao nga ginapasalamat ko Ikaw. Ug ang . . . ginaampo ko nga makauban Ikaw sa matag usa nga may hangyo nga ginapangamuyo karong gabhiona. Ug wala kami mahibalo, kung unsa kamahinungdanon, ang diyutay'ng pag-ampo, hangtud nga midangat kini sa amo mismong panimalay. Oh Dios, daw sa unsa . . . tinuod gayud—gayud Ikaw. Nianang orasa nga ang doktor molakaw na palayo, ug moingon, “Wala ko mahibalo, wala pa ako nakasaksi og unsa man nga namuhat og ingon niana,” ug kung ingon-ana namuhat gyud ang Ginoong Jesus diha sa esena.

³⁵⁸ Oh Dios, tinuod gayud Ikaw kanamo, ug malipayon kaayo kami tungod niini. Ginaampo namo nga pasayloon Mo kami sa tanan namong tinapolan nga mga pamaagi, ug sa among binurong nga mga pamaagi. Ug, oh, hinumdumi gayud kami, Ginoong, ingon nga kami'y mga tawo nga ania niining mangitngit nga kalibutan, usa ka kalibutan sa kangitngitan ug sala ug kaguliyang. Ug nagatan-aw kami sa usa ka tabil, nga anaa, nagatabon sa among nawong, ug ang makita lang namo ug nahibaloan dinhi mao ang mga nangabuhat namo sa tawhanong paagi. Apan sa umaabot nga adlaw pag mawagtang na ang tabil, makita na Ikaw namo nawong sa nawong ug maila maingon nga nailhan kami. Mao kana ang adlaw nga among ginapangandoy.

³⁵⁹ Nagaampo kami Amahan, karon, nga Imo kaming tabangan samtang ginapaningkamotan namong ipaambit sa mga tawo ang Pulong sa Dios, sumala sa ilang mga hangyo. Tangtanga ang tanang sakit nganhi kanamo. Gikinahanglan namo Ikaw, Ginoong. Ug ginaampo namo nga itugot Mo unta kini. Itugot nga maihatag nganhi kanamo ang Imong mga kalooy, kay amo kining ginapangamuyo sa Ngalan ni Jesus. Amen.

³⁶⁰ Karon, sa pagtubag sa mga pangutana, dili baya ako ang pinakamaayo sa nasud, kabalo mo. Pero tubagon ko kini kutob sa akong nahibaloan.

³⁶¹ Ania ang usa nga nasugdan ko na niadtong miaging gabii, pero kinahanglan kong hunongon úsa:

60. “Pinaagi sa usa ka Espiritu kitang tanan gibautismohan ngadto sa lawas ni Cristo.” (Nahinumduman ninyong tanan nga mao kana ang pangutana diin ako mihunong. Karon makita kana, siyempre, diha sa Unang Mga Taga-Corinto 12) . . . **Sa higayon nga atong . . . madawat ang bag-ong pagkahimugso, nagakahitabo kini. Kini ba . . . Mao na ba kini ang Bautismo sa Balaang Espiritu, o aduna pa ba'y bautismo pagkahuman, o mao ba kini ang pagkapuno?**

³⁶² Bueno, maanindot kini nga pangutana, ug mahimo gyud natong igahin ang nahibilin natong oras mahitungod niini nga pangutana, ug karong gabhiona ug ugma sa gabii ug sa mosunod pa. Maglangkob kini. . . mahimo—mahimo man gud nga mahisgotan dinhi ug maitakdo ang tibuok Kasulatan. Ang matag Kasulatan kinahanglan nga husto gayud ang pagkatakdo sa tanang uban pa nga Kasulatan sa Biblia.

³⁶³ Pero paningkamotan kong tubagon kini sa ingon ka hamubo, og tataw sumala sa nahibaloan ko kung unsaon sa pagtubag niini, dili; tungod sa higayon nga motoo ka kang Ginoong Jesus Cristo, madawat mo ang bag-ong pagkahimugso. Sa higayon nga motoo ka sa Ginoo, madawat mo ang bag-ong panghunahuna, ang bag-ong kinabuhi, pero dili kana mao ang Bautismo sa Espiritu Santo. Kita n'yo? Madawat mo ang bag-ong pagkahimugso sa diha nga mitoo ka, madawat mo ang Kinabuhing Walay Katapusan. Usa kini ka gasa sa Dios nga gihatag kanimo pinaagi sa gamhanan nga grasya tungod sa pagdawat mo sa gasa nga ginahatag kanimo sa Dios. “Siya—siya nga nagapatalinghug sa Akong mga Pulong ug nagatoo Kaniya nga nagsugo Kanako, adunay Kinabuhing Walay Katapusan.” Adunay Kinabuhing Walay Katapusan; mao kana ang bag-ong pagkahimugso, nabag-o ka na, ang buot ipasabot ika’y “miliso.”

³⁶⁴ Apan ang Bautismo sa Balaang Espiritu ang nagapahimutang kanimo ngadto sa lawas ni Cristo, ilalum sa mga gasa alang sa buluhaton. Dili kamo ginahimo niini nga mas labaw nga Cristohanon, kondili ginapahimutang lang kamo ngadto sa lawas sa mga gasa. Nasabtan n'yo? “Bueno, pinaagi sa usa ka Espiritu” (Unang Mga Taga-Corinto 12) “kitang tanan gibautismohan ngadto sa usa ka lawas. Karon,” nagaingon si Pablo, “adunay nagkalainlaing mga gasa, ug sa niini nga lawas adunay siyam ka espirituhanon nga mga gasa.” Ug sa niini nga lawas. . . Gikinahanglan mong mabautismohan ngadto sa lawas aron maangkon ang usa sa niini nga mga gasa. Ang mga niini kalakip man sa lawas.

³⁶⁵ Pero, ania, mahitungod pud sa pagkaaduna og Kinabuhing Walay Katapusan ug pagkahimong Cristohanon, usa ka na ka Cristohanon sa higayon nga mitoo ka. Bueno, dili nga nagpakaaron-ingnon lang nga nagatoo, kondili tinuod gayud nga nagatoo kang Ginoong Jesus ug ginadawat Siya ingon nga imong personal nga Manluluwas; natawo ka na pag-usab dihadiha mismo, ug adunay Kinabuhing Walay Katapusan. Nagasulod kanimo ang Dios.

³⁶⁶ Karon matikdi, Kinabuhing Walay Katapusan; ang ingon ni Jesus, “Siya nga nagapatalinghug sa Akong mga Pulong ug nagatoo Kaniya nga nagsugo Kanako, adunay Kinabuhing Walay Katapusan, ug dili na pagahukman sa silot kondili miagi na gikan sa kamatayon ngadto sa Kinabuhi.” Usa ka na ka bag-ong binuhat nianang higayona. Bueno natagbo kaniadto ni

Pablo ang pipila ka mga tawong ingon niana, diha sa Mga Buhat 19. Aduna sila'y usa ka magwawali didtong dapita nga usa ka nakabig nga abogado nga ang ngalan Apolos. Ug si Apolos usa ka tawo nga batid sa mga Kasulatan, ug ginapamatud-an niya pinaagi sa mga Kasulatan nga si Jesus mao ang Cristo. Kita n'yo?

³⁶⁷ Karon matikdi n'yo. Si Apolos, pinaagi sa Pulong, nagapamatuod pinaagi sa Pulong. “Ang pagtoo nagaabot pinaagi sa pagpatalinghug, sa pagpatalinghug sa Pulong. Siya nga nagapatalinghug sa Akong mga Pulong, ug nagatoo Kaniya nga nagsugo Kanako, adunay Kinabuhing Walay Katapusan.” Nasabtan n'yo ba? Si Apolos, pinaagi sa Pulong, nagapamatuod kaniadto. Ug kini sila mga Cristohanon, mga sumusunod sila mismo, og mga tinun-an. Ug ginapamatud-an ni Apolos pinaagi sa Pulong, nga si Jesus mao ang Cristo. Ug daku kaayo ang ilang kalipay ug gidawat nila ang Pulong, apan ang nasayran lang nila mao ang bautismo ni Juan.

³⁶⁸ Ug sa paglatas ni Pablo sa kayutaan ibabaw sa Efeso, nahibalag niya kining mga tinun-an ug miingon siya, “Nadawat na ba ninyo ang Espiritu Santo *sukad* nga mitoo kamo?” Kita n'yo?

³⁶⁹ Karon, sa diha nga motoo kamo, ang ingon ni Jesus, “Aduna kamo'y Kinabuhing Walay Katapusan.” Mao kana ang bag-ong pagkahimugso. Mao kana ang inyong pagkakabig, pagkabag-o. Apan ang Bautismo sa Balaang Espiritu mao mismo ang gahum sa Dios nga niini kamo gibautismohan pasulod ug mapailalum na niining siyam ka spirituhanon nga mga gasa para mamuhat pinaagi kaninyo; nga mao ang pagkamagwawali, mga ebanghelista, mga apostoles, mga pastor, mga propeta, . . . ug ang tanan nga mga gasa sa lawas kalakip niini, pag nabautismohan na kamo ngadto niini nga lawas. Ug kana mao'y . . . dili kamo ginahimo nga mas labaw nga Cristohanon, kondili ginapahimutang kamo nga maiposisyon sa bahin nga mamahimong usa ka nagapangalagad nga espiritu sulod sa Iglesia sa buhi nga Dios. Karon nasabtan na ba ninyo? Kita n'yo?

³⁷⁰ Karon ang pangutana . . . Tubagon nato kini tagsa tagsa, tulo man gud ka pangutana.

“Pinaagi sa usa ka Espiritu kitang tanan gibautismohan ngadto sa lawas ni Cristo.”

Husto kana, anaa sa Unang Mga Taga-Corinto 12 ang tubag niana. Bueno.

Sa higayon nga madawat nato ang bag-ong pagkahimugso, mahitabo na ba kini? Kanus-a man?

³⁷¹ Ingon niana ang gusto nilang mahibaloan, oo . . . “Pinaagi sa usa ka Espiritu . . .” Dili. Dili. “Pinaagi sa usa ka Espiritu kitang tanan gibautismohan ngadto sa usa ka lawas.” Kita n'yo, dili man dinha nagasugod ang bag-ong pagkahimugso,

nagasugod ang bag-ong pagkahimugso sa diha nga *mitoo* kamo sa Ginoong Jesus.

³⁷² Karon nakita n'yo, walay usa ka . . . walay usa ka butang . . . Karon paminaw mo. Unsa ba'y arang n'yong mabuhat gawas sa motoo? Unsa pa man diay ang arang n'yong mahimo? Unsa pa ba'y arang n'yong mabuhat gawas sa toohan kini? Sultihi ko ninyo og usa ka butang nga arang n'yong mahimo. Wala ni usa ka butang nga arang n'yong mahimo gawas sa toohan Kini. Bueno, kung aduna ma'y nagaabot gawas sa inyong pagtoo, nan dili kana inyo mismong buhat, kondili buhat kana sa Dios mismo. Busa . . .

³⁷³ Karon kung moingon ta nga pag kamo . . . Makadaghan nang higayon nga akong nasaksihan, sa makadaghang higayon, nga ginadawat sa mga tawo ang “unang kapanghimatuoran sa pagsulti og laing mga pinulongan” ingon nga ang Espiritu Santo. Ug usahay ginauyog ang mga tawo, o dukdokon sila ug pikpik-pikpikon sila, moingon, “Isulti kini. Isulti kini. Isulti kini. Isulti kini.” Kabalo mo, balik-balikon ang usa ka pulong, “Isulti kini. Isulti kini. Isulti kini.” Kita n'yo, butang kana nga kamo mismo ang nagabuhat. Ug—ug—ug dili kana . . . dili kana . . . kana—wala gyud kana'y kapuslanan. Mahimong magkaaduna kamo og pagkalibog sa laing mga pinulongan. Mahimong magkaaduna kamo og—og daghang mga butang, ug mga sensasyon. Apan kung aduna ma'y nagaabot gawas sa inyo mismong personal nga pagtoo, kinahanglan usa kini ka Balaanong gasa nga iya sa Dios nga gikahatag kaninyo. Kita n'yo?

³⁷⁴ “Ug pinaagi sa usa ka Espiritu kitang tanan gibautismohan ngadto sa usa ka lawas.” Husto kana, kita n'yo. Ang Bautismo sa Espiritu Santo usa man ka buhat nga lahi kay sa bag-ong pagkahimugso. Ang usa pagkahimugso, ang usa pud bautismo. Ang usa nagahatag kaninyo og Kinabuhing Walay Katapusan, ang usa pa nagahatag kaninyo og gahum. Nagahatag kini og gahum ngadto sa Kinabuhing Walay Katapusan, kita n'yo, aron mamuhat. Karon nasabtan n'yo ba? Okey. Maayo.

³⁷⁵ Karon ania ang usa pa, ang ikaduha, ang pinakanindot nga akong nadawat niadtong gabhiona:

61. Asa man ang Espiritu ni Jesus sulod niadtong tulo ka adlaw nga ang Iyang lawas atua sa lubnganan? Asa man ang Iyang Espiritu?

³⁷⁶ Bueno, ang Iyang Espiritu, kung subayon n'yo ang mga Kasulatan . . . bueno, mahimo kitang maghisgot sa pipila ka mga dapit. Pero, nahunahuna ko, kinsa man sa inyo ang dunay Biblia? Igsoong Stricker, aduna ka ba'y Biblia? Sige. Igoong Neville, aduna ba'y imoha? Palihog ablihi n'yo para sa ako ang Mga Salmo 16:10. Ug kinsa pa man? Igsoong babayeng Wood, aduna ka ba'y Biblia dinha? Bueno, Igsoong Stricker, (sige, usa niana), ablihi n'yo para sa ako ang Mga Buhat 2:27, Mga Buhat 2:27.

³⁷⁷ Ug karon, sa sugod pa lang, sa dihang namatay si Jesus. . . Pag mamatay kamo, mamatay man ang inyong lawas. Ang pulong nga *kamatayon* nagakahulogan og “mahimulag,” ang mahimulag gikan sa inyong mga minahal sa kinabuhi. Apan ania gisulti Niya kini, diha sa San Juan, sa ika-11 nga kapitulo, “Siya nga nagapatalinghug. . .” Dili diay. . . pasayloa ko; anaa diay kana sa San Juan 5:24, “Siya nga nagapatalinghug sa Akong mga Pulong adunay Kinabuhing Walay Katapusan.”

³⁷⁸ Miingon si Jesus kang Marta, nga misugat Kaniya, . . . Miingon si Marta, “Kung ania Ka lang unta, wala unta namatay ang akong igsoon. Apan bisan karon, bisan unsa man ang Imong pangayoon sa Dios, igahatag kini sa Dios Kanimo.”

³⁷⁹ Mitubag Siya, “Ako mao ang Pagkabanhaw ug ang Kinabuhi.” Kita n’yo? “Ang nagatoo Kanako, bisan siya mamatay, mabuhi siya; ug ang tanan nga buhi ug nagatoo Kanako, dili na gayud mamatay.”

³⁸⁰ Bueno—bueno, aduna ma’y bahin sa ato nga dili mamatay. Ug maingon nga bag-ohay lang nakong gihisgotan ang laray sa mga Kasulatan, ang tanan nga adunay sinugdanan aduna pu’y katapusan. Ang mga butang nga walay sinugdanan, mao ang walay katapusan. Busa sa diha nga gidawat nato si Cristo, ang Dios, nahimo kita nga mga anak nga lalaki ug mga anak nga babaye sa Dios, ug ang atong Kinabuhi ingon gayud ka walay katapusan maingon nga ang Kinabuhi sa Dios walay katapusan; anaa man kanato ang Walay Katapusan.

³⁸¹ Bueno, ang pulong nga *hangtud sa kahangturan*, nahisgotan na nato kini. Ang pulong nga *hangtud sa kahangturan* “usa ra ka gidugayon sa panahon,” hangtud sa kahangturan *ug* (pang-sumpay) hangtud sa kahangturan. Ug nahibaloan nato dinhi nga kini adunay—kini adunay katapusan, sama lang sa tanang mga pag-antus, ug tanang mga sakit, ug tanang kasub-anan, ug tanang mga silot, ug bisan ang impiyerno mismo aduna ma’y katapusan.

³⁸² Apan ang Kinabuhing Eternal wala gyu’y katapusan, tungod wala man Kini’y sinugdanan. Dili Kini mahimong mamatay tungod kay wala man Kini nahimugso. Wala Kini’y sinugdanan sa mga adlaw, wala Kini’y katapusan sa panahon. Karon, ang bugtong paagi aron mabuhi kita sa Walay Katapusan, mao’y pinaagi sa pagdawat sa usa ka butang nga Walay Katapusan. Ug ingon niana ang Dios; sa wala pa magkaaduna og unsa man kaniadto, anaa na ang Dios. Ang Dios wala gayu’y sinugdanan o katapusan man.

³⁸³ Ug ang Dios mao kining gamhanang Espiritu. Ngani gihulagway nato Siya sama sa—sa pito sa kolor sa balangaw nga nagatabon. . . Ang arko niana motabon mismo sa yuta kung dili kana modapat sa yuta. Tubig kana nga nagalingin sa kurbada sa kalibutan, kana ang nagaporma niana. Apan, ania, ingon

nga Eternal ang Dios, ug Siya mao ang Hingpit: hingpit nga gugma, hingpit nga pakigdait, hingpit nga kalipay, hingpit nga katagbawan. Ang tanang niadtong pito ka espiritu (sumala sa atong nahisgotan sa Pinadayag), nga migula; naglangkob sa Dios, nga mao ang kahingpitan. Tanan nang uban pa gawas niana mao’y butang nga gituis lang gikan Dinha.

³⁸⁴ Karon ang bugtong paagi aron makabalik kita sa kahingpitan, mao ang mobalik mismo pinaagi Niana (ang kahingpitan, nga mao ang Dios). Dayon modangat kita ngadto sa kahingpitan, kung ingon-ana aduna kita’y Kinabuhing Eternal; ingon nga walay katapusan, o walay—walay bisan unsa man, kondili ang hangtud sa kahangturan ra gayud nga Kinabuhing Eternal.

³⁸⁵ Karon ang ginapahinungod niya mao ang mahitungod sa kalag . . . ang espiritu. Kay ginahatud man nato ang atong mga lawas ngadto sa lubnganan bisan ang pinakabalaan sa ato, kini mismo nga lawas. Ug ang lawas . . . Sa sugod pa lang, kaniadtong ang Dios, ang Logos nga migula gikan sa Dios . . .

³⁸⁶ O, maingon sa nahisgotan ko na, ang tawag Niini sa mga Katoliko, “ang Eternal nga pagka-anak sa Dios.” Nga, sa ako nang gikaingon kaniadto, wala gayu’y kahulogan ang maong pulong. Kita n’yo, dili mamahimong magkaaduna og Eternal nga anak, tungod kay ang anak aduna man gayud og sinugdanan. Ug mao nga si Jesus adunay sinugdanan, ang Dios walay sinugdanan. Kita n’yo? Apan ang Anak mao ang . . . dili Eternal nga pagka-anak, tungod ang Anak nga atua sa Amahan sa sinugdan mao man ang Logos nga migula gikan sa Dios.

³⁸⁷ Ug mao kadto ang theophany sa Dios nga migula. Pormang tawo nga ang mga mata dili sama sa inyoha nga makakita; pero mas gamhanan nga mata. Ang mga dalunggan dili sama sa inyoha nga makadungog, pero mas maayo ang pangdungog. Kita n’yo, usa Kadto ka theophany, ingnon ta nga, kining tibuok balangaw mikunsad sa pagkahimong usa—usa ka theophany. Nakita Kadto ni Moises sa dihang milabay Kadto sa bato nga sama niana. Nakita niya ang likod nga bahin, og miingon, “Mora Kadto og usa ka tawo.”

³⁸⁸ Nakita pud Siya ni Abraham kaniadtong mikanaug Siya diha sa tawhanong unod ug mikaon og karne sa nating baka, miinom og gatas, ug mikaon og mantekilya. Nakita Siya ni Abraham sa dihang atua Siya niadtong nga lawas, ug pagkahuman nawala ra sa gilayon gikan didto. Nahibaloan nato nga ang atong mga lawas naglangkob og dise-sais ka mga elemento sa yuta, og giusa lang ang mga niini. Ug giusa kini sa Dios, ug gipahimutang Niya ang duha ka Manulonda sulod sa niini nga mga lawas; mga Manulonda nga makatindog ug makasulti. Ug ang mga Manulonda nga tawo man niadtong usa . . . ug niadtong panahona.

³⁸⁹ Karon matikdi, nahibaloan pud nato nga, Kadto si Melquisedec walay lain kondili ang Dios Mismo! Kadto wala na gyu'y lain pa, kay Siya man mao ang Hari sa Salem nga mao ang Jerusalem. Wala Siya'y amahan ni inahan; mao nga dili mahimong si Jesus kadto, tungod Siya aduna ma'y amahan ug inahan. Pero si Melquisedec walay sinugdanan sa mga adlaw, wala pu'y katapusan sa kinabuhi; aduna lamang og Usa nga ingon niana, ang Dios. Ang Dios kadto nga nagapuyo dinha sa usa ka theophany. Kita n'yo? Matikdi, Hari sa Salem.

³⁹⁰ Bueno, nagkinabuhi ang Dios sa tanang panahon, pinaagi sa Iyang katawohan. Ang Dios kadto nga atua kang David, nga nagpahimo kaniya nga mamaatua sa bukid, ingon nga usa ka sinalikway nga hari, ug nagahilak. Ang mao mismo nga Espiritu nadayag diha kang Jesus nga Anak ni David, Nga gisalikway sa Jerusalem ug mihilak.

³⁹¹ Si Joseph, nga gibaligya sa katloan ka buok nga salapi, gidumtan sa iyang mga igsoon, pero hinigugma sa iyang amahan, gipalingkod sa tuo ni Faraon, ug walay si kinsa man ang makaduol gawas kon... moagi una kang Joseph, ug pag mobudyong ang trumpeta ug ang tanan mangluhod kang Joseph: hingpit gyud nga tipo ni Cristo. Ang Espiritu kadto ni Cristo nga nagakinabuhi pinaagi niadto nga mga tawo. Kita n'yo?

³⁹² Karon, bueno sa dihang namatay si Jesus, ang Dios kadto nga nadayag sa unod. Ang Dios nga nahimong tawo. Sa balaod sa pagtubos, ang bugtong paagi para matubos sa usa ka tawo ang nawala nga panag-iya didto sa Israel, gikinahanglan nga usa siya ka kabanay. Gikinahanglan nga usa siya ka duol nga kabanay. Maanindot ang pagkasaysay sa Basahon ni Ruth mahatungod niini; ug gikinahanglan nga usa siya ka kabanay. Busa kinahanglan sa Dios nga mamahimong kabanay sa tawo, aron ang tawo mamahimong kabanay sa Dios. Kita n'yo?

³⁹³ Ang tawo adunay espiritu sa sulod niya, aduna niana ang usa ka tawo sa diha nga mahimugso siya, tungod kay espiritu man kana sa kinaiyahan. Ang espiritu kana nga iya sa kalibutan, kana ang espiritu nga iya sa—sa dios niining kalibutana. Siya'y usa lamang ka kaliwat ni Adan.

³⁹⁴ Ginapadaghan sa usa ka punoan ang kaugalingon niini. Ginapadaghan sa mga tanum ang kaugalingon niini. Ginapadaghan sa kahayopan ang ilang mga liwat. Nagapadaghan sab mismo ang mga tawo. Sila mao ang binuhat gikan sa orihinal. Nasabtan n'yo ba?

³⁹⁵ Karon, karon sa dihang nahimugso ang usa ka tawo, nahimugso siya nga may espiritu kaniya nga iya niining kalibutana. Mao kana'y hinungdan nga gikinahanglan niya nga matawo pag-usab. Kay kini nga espiritu naggikan man sa pagpanamkon, nga pinaagi sa pagpakighilawas sa amahan ug inahan, ug bug-os gayud nga dili mahimong mabuhi hangtud

sa kahangturan. Busa gikinahanglan niya nga matawo pag-usab. Ug sa dili pa siya mahimong ingon niana, gikinahanglan sa Dios nga mokanaug kaniadto ug maghimo og paagi aron matawo pag-usab ang tawo; tungod wala man siya'y paagi para tubuson ang iyang kaugalingon, wala gani siya'y paglaum. Siya walay . . . walay paglaum, walay Dios, walay Cristo, sa kalibutan, nahisalaag ug napahilayo. Siya—siya . . . walay unsa man nga puede niyang buhaton aron luwason ang iyang kaugalingon. Siya . . . sa matag . . . Bisan pa kung siya'y usa ka labaw'ng sacerdote, kung usa man siya ka obispo, kung usa man siya ka papa, o kung unsa man, siya'y ingon gayud ka sad-an usab nga sama ni kinsa pa man.

³⁹⁶ Busa, gikinahanglan ang Usa nga walay sala, nga mao'y mobuhat niadto. Ug ang Bugtong nga walay sala mao ang Dios Mismo. Ug mao nga gikinahanglan sa Dios nga mokanaug kaniadto ug mamahimong tawo (ug mikanaug Siya sa porma ni Cristo) aron mailubong ang ikot sa kamatayon, aron wagtangon gyud ang ikot sa kamatayon, aron matubos kita, aron kita . . . dili pinaagi sa atong maayong mga buhat o pinaagi sa atong pagkamaayo (wala man kita'y bisan unsa), kondili pinaagi sa Iyang grasya, nga kita maluwas. Dayon madawat nato ang Iyang Kinabuhi pasulod niining lawas nga may-kamatayon, ug karon kita'y mga anak nga lalaki ug mga anak nga babaye sa Dios, ug adunay Kinabuhing Walay Katapusan sa kinasuloran nato. Kita'y mga anak nga lalaki ug mga anak nga babaye sa Dios. Busa, si Jesus, ingon nga buhi . . .

³⁹⁷ Ug walay tawo, bisan unsa pa ka dautan o unsa pa ka maayo, pag siya'y . . . pag mobiya na siya dinhi sa yuta, dili man ingon nga patay na gyud siya. Kondili anaa lang siya sa lahi nga dapit. Tungod aduna man siya'y kinabuhi nga pagalaglagon, pagkahuman niyang masilotan didto sa impiyerno tungod sa iyang mga binuhatan, siya . . . apan kana nga kinabuhi pagapuohon gayud. Ingon nga aduna lamang og usa ka matang sa Kinabuhing Eternal.

³⁹⁸ Bueno, nahisgotan na nato kana. Kung ang usa ka tawo makasasala ug pagasilotan siya hangtud sa kahangturan . . . Dili siya mahimong silotan hangtud sa kahangturan gawas kon aduna siya'y Kinabuhing Eternal. Kung aduna siya'y Kinabuhing Eternal, nan luwas diay siya. Kita n'yo? Busa aduna lamang og usa ka matang sa Kinabuhing Eternal, ug kana mao ang Zoe, “ang Kinabuhi nga iya sa Dios.” Ug dili siya mamatay.

³⁹⁹ Apan ang mga dautan anaa sa dapit sa—sa paghulat (nga anaa sa pag-antus) para sa paghukom kanila (para hukman sumala sa mga buhat nga gibuhats nila dinhi niining lawasa) sa kaulahiing adlaw. Karon, pero kita . . . Adunay mga tawo nga ang ilang mga sala dayag nga nagauna kanila, ang sa uban usab nugasunod kanila.

400 Karon kung isugid nato ang atong mga sala, matarung Siya para pasayloon kita, busa dili na ta kinahanglan nga moatubang pa sa paghukom sa Dios. Nasabtan n'yo ba? Tan-awa n'yo, ang Mga Taga-Roma 8:1, "Busa karon wala na'y pagkahinukman sa silot niadtong mga anaa na kang Cristo Jesus." Niadtong mga ANAA NA kang Cristo. Miagi na gikan sa kamatayon ngadto sa Kinabuhi; kita n'yo, dili na kita pagahukman sa silot ug anaa na kang Cristo Jesus. "Nga wala nagakinabuhi uyon sa unod, kondili uyon sa Espiritu." Kita n'yo? "Siya nga nagapatalinghug sa Akong mga Pulong, nagatoo Kaniya nga nagsugo Kanako, adunay Kinabuhing Walay Katapusan."

401 Ug kung gidawat na ako diha kang Cristo, ug giako na ni Cristo ang paghukom nga para sa ako, ug gidawat ko na ang Iyang halad-pasig-uli para sa akong mga sala, nan sa unsa mang hinungdan nga hukman ako sa Dios? Humana Niya akong gihukman, kaniadtong gihukman Niya si Cristo. Kung ingon-ana gawasnon na ako sa paghukom. "Ug kon makita Ko ang Dugo, molabay Ako ibabaw kaninyo." Kita n'yo?

402 Apan, karon, dili ingon niana ang sa mga dautan. Mahiadto gyud siya sa dapit sa pag-antus. Ug nasayod kita nga tinuod kana. Buhi ang mga dautan. Anaa siya sa dapit sa pag-antus. Anaa siya sa dapit kon diin wala siya mahibalo. . . Sa ingon-anang paagi ginatawag sa niining mga espirituwalista ug espiritista ang mga espiritu sa mga tawo nga mitaliwan na, nga mora'g nagabinuang ug nagasulti sila og mahugaw nga mga pagpakatawa, kung nakakita na kamo og ingon niana. Bueno. Ngano man? Dili nila. . .

403 Tan-awa n'yo kining si Miss Piper, sa wala pa namantala ang akong artikulo nga *The Miracle of Donny Morton*. Pila ba ang nakabasa niadtong artikulo? Oo, daghan na diay sa inyo ang nakabasa, oo. Ug anaa kadto sa *Reader's Digest*. Namatikdan ba ninyo? Sa wala pa kadto, namantala kining si Miss Piper, ang ilado kaayo nga espiritista nga nailhan sa kalibutan. Dose mismo ka panid ang gigahin para sa iyang estorya. Ug sulod sa singkuenta ka tuig. . . Ginapasundayag nila siya sa tibuok kalibutan, ug may siyentipikong kapanghimatuoran pa ug tanan na, nga "tinuod gayud kono nga nagapakig-istorya siya sa mga patay, ug magpakita kono kini nga mga tawo." Unsa? Ni usa ka higayon wala man gani nahisgotan ang Ngalan sa Dios, walay paghinulsol, walay Balaanong pagpang-ayo, walay unsa man mahitungod Niini, kita n'yo.

404 Ang butang lamang, nga nahisgotan mao kadtong mga tawo, "Juan, wala ka ba makaila sa ako? Ako si George nga taga *ingon niini* nga lugar, ug nabuhat ko ang *ingon niini-ug-ingon niana* ug *ingon niini-ug-ingon niana*. Nahinumduman mo ba kadtong lugar nga atong giadtoan kaniadtong ug gibuhat nato ang ingon-ani?" Kita n'yo, kana lang ang nahibaloan nila. Napahilayo na

gyud sila. Milagpas na sa . . . Sa ilaha—sa ilaha wala na gayu'y nahibilin pa kondili ang paghukom.

⁴⁰⁵ Kung asa naharag ang kahoy, didto kini matumba. Ug ang kahintang n'yo sa dihang kamo namatay . . . Mao kana'y hinungdan nga dili ako nagauyon sa pagpang-ampo para sa mga patay, kita n'yo, og sa pagpangaliya diha sa mga pag-ampo o—o panag-ambit sa mga santos ug uban pa. Dili man kana mamahimo, sumala sa Pulong sa Dios. Wala ma'y mahatag nga kaayohan ang mag-ampo para sa kang kinsa man human nga sila mitaliwan na. Tapos na sila. Sila'y . . . sila'y . . . Nalabang na nila ang utlanan tali sa kalooy ug paghukom. Mahimong nahiadto sila sa kalooy, o napahilayo gikan sa kalooy. Mao kana ang giingon si Jesus, diha sa ika-16 nga kapitulo sa San Mateo, Iyang—Iyang—Iyang gitudlo kana; sa ika-16 nga kapitulo sa Marcos, nagatoo ko nga mao kana. Bahin sa tawong dato ug ni Lazarus; walay tawo ang makalabang nianang dakung bungaw, ug wala gayu'y makalabang sukad! Ingon-ana. Kita n'yo? Busa mao na kana.

⁴⁰⁶ Bueno, apan sa dihang namatay si Cristo, ang tanan kinahanglan magasaksi gayud nga Siya mao ang Cristo. Karon moadto kita sa inyong pangutana. Ang una gyud, wala na midan-ag ang mga bitoon, misalop sàb ang adlaw, ayaw na ihatag sa bulan ang iyang kahayag, og miulbo ang mga bato sa yuta, kaniadtong namatay Siya. Ug miadto Siya ug nagwali sa mga kalag nga atua sa bilanggoan, nga wala naghinulsol niadtong pagkamapailubong mga adlaw ni Noe. Siya'y, gikinahanglan nila nga maila. Tan-awa n'yo kana! Ug kung aduna ma'y usa ka makasasala dinhi karong gabhiona, palandunga kana sa kadali. Sa umaabot nga adlaw kining Ebanghelyo nga imong nadungog nga ginawali karon, magapamatuod ka pinaagi Niini. Sa kung asa man moluhod gyud ka, bisan kinsa ka pa. Tingali'g napulo pa ka libo gikan karon, tingali'g dili na magdugay . . . inig ka buntag. Kung kanus-a man kana, moluhod gyud ka sa kung asa man, ug madungog mo kining mao ra mismo nga Ebanghelyo nga iwali pag-usab kanimo.

⁴⁰⁷ Kay human nga kadtong mga kalag nga atua sa bilanggoan, nga wala naghinulsol kaniadtong si Enoch ug ang tanan kanila nanagwali, ug si Noe . . . ug nagmapailubon ang Dios kaniadto, sama karon, ginapaabot na lang gyud nga moabot kanang orasa. Ug si Noe ug si Enoch ug silang tanan nanagwali, pero gikatawan ug gibiyabiayan lang sila niadto nga mga tawo. Ug mao nga atua sila sa bilanggoan, ug miadto si Jesus didto ug nagwali sa mga kalag nga atua sa maong bilanggoan. Nagpamatuod Siya! Nagpamatuod ang kalangitan nga Siya kadto, nagpamatuod ang yuta nga Siya kadto, nagpamatuod ang impiyerno nga Siya gayud kadto!

⁴⁰⁸ Miingon ang Biblia nga kadtong . . . Si David, daghan nang mga tuig ang nanglabay kaniadto, diha sa Mga Salmo . . . Sige,

Igsoon, basaha dinha ang Mga Salmo, palihog. Mga Salmo 16:10. [Ginabasa ni Igsoong Neville ang Kasulatan—Ed.]

[Tungod kay dili mo pagabiyaan ang akong kalag sa sheol; ni motugot ka nga ang imo Nga Balaan makakita sa pagkadunot.]

409 Basaha ang mao ra usab mismong, giwali ni Pedro, igsoon, diha sa Mga Buhat, sa ika-2 nga kapitulo, sa ika-27 nga bersekulo. [Ginabasa ni Igsoong Stricker ang Kasulatan—Ed.]

[Kay dili mo pagpasagdan ang akong kalag sa hades, dili mo itugot nga ang imo Nga Balaan makakita sa pagkadunot.]

410 Basaha sàb ang duha ka bersekulo sa ibabaw niana, igsoon, aron nga makuha mo ang konteksto niini.

[Kay si David nagaingon mahitungod Kaniya, nakita ko sa kanunay ang Ginoo sa akong atubangan, kay siya ania man sa akong too, aron dili ako matarug:]

[Tungod niini nahinangup ang akong kasingkasing, ug nagakalipay ang akong dila; ang akong unod usab nagapahulay sa paglaum:]

[Kay dili mo pagpasagdan ang akong kalag sa hades, dili mo itugot nga ang imo Nga Balaan makakita sa pagkadunot.]

411 Basaha pud ang sunod nga bersekulo.

[Gipaila mo kanako ang mga dalan sa kinabuhi; pagapun-on mo ako sa kalipay sa imong nawong.]

412 Oo, matikdi n'yo. Karon, Jehovah Witness kong higala, gusto ko kamong pangutan-on mahitungod niana. Kita n'yo? Kung usa ka dapit ang impiyerno, Hades, Sheol, unsa man ang gusto n'yong itawag niana, kung hangtud ra kana sa lubnganan, nan nganong miingon man Siya, “Dili Ko pagabiyaan ang Akong kalag sa sheol, ni motugot Ako nga ang Ako Nga Balaan makakita sa pagkadunot”? Unsa man kana? Kita n'yo?

413 Atua ang Iyang lawas, sa lubnganan; ug ang Iyang kalag atua sa impiyerno, nga nagawali, buhi mismo! Unsa man kana? Anaa Siya sa Iyang theophany pag-usab. Ang Iyang kalag atua didto kauban kadtong mga tawo nga anaa sa theophany usab. Ug nagapamatuod kanila, nga sila “wala naghinulsol niadtong pagkamapailubon.”

414 Siya. . . Sa laing pagkasulti, mituktok Siya sa pultahan. Ug pagkaabli sa pultahan, ug sa tanang mga kalag nga naghinulsol, Siya miingon, “Ako mao ang Binhi sa babaye. Ako Mao kang kinsa si Enoch dinhi. . .” Didto sa Paraiso, nga usa na usab ka dapit. Ayaw n'yo kalimti kining tulo ka dapit, ha: ang dapit sa mga dautan, ang dapit sa mga matarung, ug ang impiyerno mismo. Kita n'yo?

415 Sama lang sa trinidad sa Langit, sama sa: Amahan, Anak, ug Balaang Espiritu. Sama sa trinidad sa mananap: ang mini nga propeta, ang mananap, ug ang—ug ang marka sa mapintas nga mananap. Ug kana tanan, hinumdumi n'yo, ang tanan anaa sa trinidad. Ang trinidad maglangkob sa usa, nga gihingpit. Gihingpit nga usa. Gihingpit kamo, nga usa sa tulo: kalag, lawas, ug espiritu; tubig, dugo, ug mga ugat. Kita n'yo, unsa man kamo, magkinahanglan kamo og tulo para mahimong usa nga hingpit. Pagkuha mo og usa kabuok nga bildo nga may tulo ka kanto ug ibulad n'yo kana sa adlaw, og magpatungha kana og hingpit nga balangaw. Kita n'yo, ang tanan, kinahanglan aduna kamo og tulo aron maghimo og usa nga hingpit.

416 Ug karon, hinumdumi n'yo kana, nga niadtong pagkamatay Niya, miadto Siya una ug nagwali sa mga kalag nga wala sa bilangoan. . . nga atua sa bilangoan, ug nagpamatuod nga Siya mao “ang Binhi sa babaye.” Siya “Mao kadtong nakita ni Enoch nga magaabot uban ang napulo ka libo sa Iyang mga balaan.” Gikinahanglan Niyang pamatud-an ang mga Kasulatan nga giwali ni Noe, ug ni Enoch, ug sa mga matarung, nga, “Siya Mao kadto.” Ang tanan kinahanglan nga makaila gyud Niini!

417 Pagkahuman miadto Siya sa impiyerno, ug gidawat ang mga susi sa kamatayon ug sa impiyerno gikan sa yawa.

418 Mibalik ngadto sa Paraiso; ug gidala sila Abraham, Isaac, ug Jacob, ug ang mga matarung; ug namangon (Mateo 27), ug migula sila gikan sa lubnganan ug misulod ngadto sa siyudad, ug nagpakita sa mga tawo ngadto sa dalan. Alleluyah! Mao kana!

419 Karon, apan ang Iyang lawas. . . Samtang ang Iyang kalag atua nagpamatuod sa mga nangalaglag, atua nga ginakuha ang mga yawi gikan sa yawa, ug mibalik ug gidala si Abraham ug si Isaac; ang Iyang kalag atua sa. . . ang Iyang kalag atua didto nga ginabuhat kini, ug ang Iyang lawas usab atua napahimutang sa lubnganan. Mao kana'y hinungdan nga miingon si Jesus. . . Moingon ang mga tawo, “Bueno, nganong miingon man si Jesus, “Tulo ka adlaw, banhawon Ko kini, sa ikatulo ka adlaw Ako mabanhaw”? Siya—namatay Siya Biyernes sa hapon, og nabanhaw sa Dominggo sa buntag.”

420 Apan matikdi n'yo, kadto'y “*sulod* man sa tulo ka adlaw,” kung susihon n'yo ang lexicon. Kay nasayod man Siya nga si David, sa ilalum sa pagdihog (sa pagdihog sa Balaang Espiritu), miingon, “Dili Ako motugot nga ang Ako Nga Balaan makakita sa pagkadunot.” Nasayod Siya mismo nga nakapahinungod kadto Kaniya. Hingsayran Niya nga Siya ang ginapahinungdan niadto. Siya Mao ang Balaan sa Dios, ug nasayod Siya nga ang pagkadunot magasugod human sa setenta'y-dos oras. Sulod niadtong tulo ka adlaw, mogawas gyud Siya pag-usab gikan didto, tungod kay ang mga Kasulatan dili man mahimong mapakyas.

421 Ug ang matag saad Dinha nagapahinungod man sa ako ug nagapahinungod sàb sa inyo, atoa kini!

422 Miingon Siya, “Gub-on man ninyo kini nga lawas, ug pagabanhawon Ko kini sa ikatulo ka adlaw.” Kay Siya miingon man, “Dili Ko pagabiyaan ang Akong kalag sa sheol, ni motugot Ako nga ang Ako Nga Balaan makakita sa pagkadunot.”

423 Nasayod Siya, nga sulod sa tulo ka adlaw kadto nga lawas mogawas gyud gikan didto. Ngani wala man Siya nagpabilin didto sa tibuok tulo ka adlaw. Wala, sir, tinuod gayud nga wala Siya nagpabilin didto. Nagpabilin lang Siya gikan sa Biyernes sa hapon hangtud sa Dominggo sa buntag, nga wala ni usa ka selula niadto nga lawas ang nadaut.

424 Ug patay na Siya, ug gipaembalsamar, ug naphimutang. . . o giputos og panapton, ug gipahimutang sa lubnganan. Ngani niadtong mainit, lapokon nga lungsod, pipila lang ka oras ug madugta na Siya. Mopaingon ka sa pagkadug- . . . pagkadugta, kabalo mo, ang lawas sa tawo, madugta ang iyang ilong ug mga ingon-anang butang, mosugod na ang pagkadugta; ingon nga mainit, og basaon kadto nga lungsod. Ug mopaingon gyud kadto sa pagkadugta, tungod kay usa man kadto ka lawas. Apan nasayod Siya, sa dili pa madugta kadtong selula, nga miingon ang Dios pinaagi ni David nga propeta, “Dili Ako motugot nga ang Ako Nga Balaan makakita sa pagkadunot.”

425 Gitooan gayud Niya ang Pulong sa Dios ug nagkinabuhi pinaagi Niini! Bueno, ang matag usa niadtong mga saad nga nakapahinungod Kaniya, gituman gyud sa Dios ang matag usa niadto. Ug ang matag saad nga nagapahinungod sa magtotoo, tumanon gyud sa Dios ang matag saad Niini. Amen. Makasigurado gayud kamo nga Kini mao ang Kamatuoran. Amen. Busa, ang Iyang kalag. . .

Sa hunahuna mo ba . . . Dili, pasensya na. Asa man ang Espiritu ni Jesus niadtong tulo ka adlaw nga ang Iyang lawas atua sa lubnganan?

426 Ang Iyang Espiritu atua sa impiyerno, didto sa kinahiladman nga dapit; ug mibangon Siya. Ug tingali'g modugang lang ko og diyutay'ng—diyutay'ng pahayag dinhi nga mahimong makatabang gayud kaninyo. Sa diha nga mibangon Siya, ang Iyang. . . Kaniadtong mibangon Siya gikan sa mga patay, wala pa Niya bug-os nga natapos ang buluhaton sa pagtubos. Husto kana. Gikinahanglan sà Niyang limpyohan ang tibuok butang. Hinoon nabayran na ang bili, apan ang kahadlok sa impiyerno, ang kahadlok sa lubnganan. . . Ug ania, kaniadtong Siya—kaniadtong namatay na Siya, nagpadayon ra gihapon Siya. Wala Siya mihunong sa pagpamuhat kaniadtong namatay na Siya, nagpadayon gihapon Siya sa pagwali! . . . ? . . . Pasensya na mo sa akong bakikaw nga paglihok, sa tan-aw ko, pero wala gayud Siya sukad mihunong!

427 Dili gayud kamo mamatay! Mahimong mopahulay ang inyong lawas sa hamubo nga panahon, apan pagabanhawon kana sa Dios, nagsaad man Siya nga buhaton Niya kana. Mao nga dili kamo mamatay maingon man usab nga ang Dios dili mamatay. Tinuod kana. Matikdi n'yo, ang Iyang. . . human nga Siya namatay, hangtud sa. . . patay sa mga tinun-an. Natulog Siya, ingon niadto ra Siya. Gipakatulog nila Siya; maingon sa Iyang gisulti mahitungod kang Lazarus, "Pagapukawon Ko siya." Gipakaw Siya kaniadto sa Dios.

428 Matikdi, nagpadayon ra Siya mismo kaniadto, nagpadayon Siya sa pagwali. Ug nagwali Siya sa mga kalag didto sa bilangoan. Miadto mismo sa impiyerno, og gikuha ang mga yawi gikan sa yawa. Mibalik paitaas ug nagwali pag-usab didto sa Paraiso, ug nabanhaw sa ikatulo ka adlaw. Giduaw ang Iyang mga apostoles sulod sa kuwarenta ka adlaw, ug sa natapos na ang ika-kuwarenta ka adlaw, mikayab na Siya; tungod kay, ang tanan nga nagapaibabaw kanato, ang mga too-too ug tanan nang uban pa. . . giwagtang Niya ang tanang too-too, ang tanang pagduhaduha, ug naghimo og linya sa pag-ampo gikan sa yuta paingon sa Himaya sa Iyang pagkayab. Mikayab ug milingkod sa tuo sa Iyang pagka-Halangdon. Mananaug! Ang Gamhanang Mananaug, walay pagduhaduha. Ang kamatayon dili gayud makapugong Kaniya! Ang impiyerno dili makapugong Kaniya! Ang yuta dili makapugong Kaniya!

429 Kaniadtong ania pa Siya sa yuta, gihatagan Siya og. . . miadto Siya sa pinakaubos nga siyudad ug sa pinakaubos nga mga tawo, ug gibansagan og pinakaubos nga ngalan. Ingon niadto ang gibuhat sa tawo Kaniya. Miadto Siya sa Jerico, nga pinakaubos nga siyudad. Ngani ang pinakagamay'ng tawo didto kinahanglan pa nga mokatkat sa usa ka kahoy para lantawon Siya sa ubos. Dinha Siya gipahimutang sa tawo. Siya'y nahimong usa ka tighugas sa tiil, nga pinakaubos nga trabaho nga maihatag. Nahimo Siyang pinakaubos. Ug gibansagan Siya og pinakaubos nga ngalan nga mahimong ibansag, *Beelzebub*, "ang principe sa mga yawa." Gihatagan Siya sa tawo og pinakaubos nga ngalan, pinakaubos nga bahin, ug gidala Siya ngadto sa pinakaubos nga dapit sa pinaka-kinahiladman sa impiyerno.

430 Pero gibanhaw Siya sa Dios ug gipakayab ngadto sa Kahitas-ang Kalangitan, ug gihatagan og usa ka Ngalan nga labaw sa tanang mga ngalan. Alleluyah! Aba, kinahanglan na gani Niyang modungaw aron makita ang Langit. Ang Imong Trono gibayaw nga labaw pa sa kalangitan sa Langit. Ug ang pinakamahimayaon nga Ngalan nga maipangalan diha sa Langit ug sa yuta angay gayu'ng. . . mailakip Kaniya. Ingon-ana ang gibuhat sa Dios Kaniya. Ang tawo gipahimutang Siya sa pinakaubos, pero ang Dios gihimo Siya nga Pinakahataas. Ingon niana Siya, gikan sa pinakaubos gihimong, Pinakahataas.

431 Siya'y nahimong pinakaubos aron nga madala Niya kita ngadto sa Pinakakahitas-an. Siya'y nahimong kita, aron nga kita pinaagi sa Iyang grasya mahimong Siya, mga anak sa Dios. Didto Siya miadto. Amen! Dalaygon ang Iyang Ngalan. Naghimo Siya og paagi aron nga kita makaadto, usab, sa umaabot nga adlaw, "Tungod Ako buhi, kamo usab mabuhi."

432 Oh, dili ikatingala... Pagmasabtan sa tawo ang maong panan-awon, wala gayu'y tawo nga makasaysay niana. Gani gisulayan nilang isaysay kini, og nawad-an hinoon sila sa hustong pangisip; kining mahimayaon nga awit: "Oh, ang gugma sa Dios, daw sa unsa ka madagayaon ug pagkaputli! Daw sa unsa ka dili-matugkad ug pagkakusgan!" Ang ulahing berso...o siguro ang unang berso, ingon-ani: "Kung ang kadagatan pagapun-on man og tinta, Ug ang kalangitan ang himoong sulatanan;..." Kabalo ba mo kung asa kana napalgan? Nahisulat kini sa buang...sa dingding sa usa ka institusyon sa mga buang. Wala gayu'y tawo sukad-sukad ang makasaysay sa Gugma sa Dios. Oh, dili gani arang maisaysay, ang Iyang gibuhat alang kanato. Grabe, unsaon man ninyo sa pagpangandak ni usa ka maayong buhat dinha? Iyang grasya ra gyud kini, gikan sa sinugdan hangtud sa katapusan. Nahisalaag ako, wala na'y mahimo, ug wala na'y paglaum, walay kamaayo, walay pulos, ug Siya tungod sa Iyang grasya mianhi ug giluwes kita. Oh, grabe. Ingon-ana ang Iyang... Ingon-ana ang akong Ginoo. Ingon-ana ang Iyang gugma, ingon-ana ang Iyang pagkamaayo.

433 Karon aduna na lang kita'y mga siete minutos ug mga kinse ka pangutana ug...

62. Nagatoo ka ba nga husto para sa mga kababayen-an nga mobuhat og personal nga buluhaton sa gawas sa iglesia?

434 Oo. Mao kana ang pangutana, usa lang ka...dili usa ka pangutana bahin sa kasulatan, pero...Oo, nagatoo ako. Oo, sir, mga magbubuhay man kitang tanan. Ang mga babaye aduna man pu'y ilang bahin, ug tinuod gayud duna sila'y bahin. Oo, sir. Buhata lang ninyo ang tanang personal nga buluhaton nga mahimo n'yo, ug panalanginan kamo sa Dios tungod niana.

Bueno, karon tan-awon nato:

63. Palihog isaysay ang trinidad. Giunsa man nga ang Anak nagalingkod sa tuo sa Amahan, nga nagapangaliya alang sa...ngadto sa Amahan, kung dili sila duha ka persona?

435 Bueno, minahal nga higala, usa kana...kana'y—usa kana ka kapadayagan. Kung miingon si Jesus, "Ako ug ang Akong Amahan Usa ra," nan unsaon man nila sa pagkahimong duruha? Nasabtan n'yo? Bueno, dili sila duruha.

436 Miingon sa ako ang usa ka babaye kaniadto, ug ginasaysay ko kini, ang ingon, "Kamo sa—sa imong asawa duha mo, pero usa ra kamo."

437 Ingon ko, “Apan, ang Dios ug ang Anak lahi man niana, kita mo.” Ingon ko, “Nakita ba ko nimo?”

“Oo.”

“Nakita ba nimo ang akong asawa?”

“Wala.”

438 Ingon ko, “Nan, dili ingon niana ang Amahan ug Anak; miingon si Jesus, ‘Kon nakita n’yo Ako, nakita n’yo na ang Amahan.’” Kita n’yo?

439 Ang Amahan ug ang Anak...Ang Amahan mao ang Makagagahum-sa-tanan nga Jehovah (nga Dios) nga nagapuyo sa usa ka tabernakulo nga gitawag nga Jesus Cristo, nga mao ang dinihogan nga Anak sa Dios. Si Jesus Tawo, ang Dios Espiritu. Ug walay pa gayu’y tawo nga nakakita sa Dios, kondili ang bugtong *nagagikan* sa Amahan mao ang nagpaila Kaniya. Siya’y...Siya...ang Iyang personalidad, ang Iyang pagka-Siya, ang Iyang pagka-Dios, og kung unsa Siya, Dios Siya mismo! Siya wala gyu’y lain kondili ang Dios mismo. Pero, usa Siya ka Tawo. Usa Siya ka Tawo, usa ka balay nga gipuy-an sa Dios. Husto, Siya mao ang puloy-anan sa Dios.

440 Karon, kung gusto n’yo og pipila ka Kasulatan mahitungod niana: Igsoong Neville, kung mabasa mo unta para kanako ang San Marcos 14:62. Ug Igsoong babayeng Wood, palihog basaha pud para sa ako ang Mga Taga-Efeso 1:20. Aduna pa ba’y uban nga dunay Biblia? Bueno, ipataas n’yo ang inyong kamot. Igsoong babayeng Arnold, aduna ba’y imoha dinha? Sige, palihog basaha para sa ako ang Mga Buhat 7:55. Sige. Marcos 14:62, kang Igsoong Neville; ug kang Igsoong babayeng Wood ang Mga Taga-Efeso 1:20; Mga Buhat 7:55, kang Igsoong babayeng Arnold.

441 Sige, napakli na ba nimo, Igsoong Neville? Sige, palihog ko’g basa. [Ginabasa ni Igsoong Neville ang Kasulatan—Ed.]

[Ug miingon si Jesus, Ako mao: ug makita ninyo ang Anak sa tawo nga magalingkod sa tuo sa gahum, ug moanhi uban sa mga panganod sa langit.]

442 Bueno, karon, matikdi n’yo ang unang mga pulong dinha, ang ingon ni Jesus, “AKO MAO.”

443 “AKO MAO.” Kinsa ba ang AKO MAO? Wala gayu’y tawo sa tibuok kalibutan ang makahubad Niini. Bisan ang...kamo nga mga nagabasa sa mga lexicon ug uban pa, wala gayu’y tawo sukad ang nakasaysay...Kining J-v-h-u. Ug bisan ang mga eskolar nga Hebreohanon dili nila malitok Kini. Kadtong nagadilaab nga sapinit didto, niadtong adlawa nga nakigtagbo Siya kang Moises, Kadto’y J-v-h-u. Busa ang paglitok nila Niini, “J-o-h, Jehovah,” pero dili gyud Kini “Jehovah.” J-v-h-u, kita n’yo, walay si kinsa man ang nahibalo.

444 Ug moingon mo, “Bueno, wala man sàb Kini mahisabti ni Moises.”

445 Ang ingon niya, “Kinsa man ang isulti ko?”

446 Mitubag Siya, “Isulti mo, ‘AKO MAO’ ang nagsugo kanimo. AKO MAO.”

447 Karon matikdi n’yo, ang *AKO MAO* usa ka pang-karon, dili nga “Ako kaniadto” o “Ako sa umalabot,” AKO MAO. Bueno, ang ingon Niya, “Kini mamahimong handumanan sa tanan nga mga kaliwatan: AKO MAO.”

448 Bueno matikdi n’yo si Jesus nga atua didto sa fiesta niadtong adlaw. Miingon sila, “Nasayod kami nga Ikaw buang-buang.” Ang husto nga mga pulong niini, “Wala ka sa hustong pangisip.” (Ang buot ipasabot sa *wala-sa-hustong-pangisip* mao’y “buang-buang.”) “Nasayod kami nga Ikaw buang-buang. Usa Ikaw ka Samaritanhon, adunay yawa Kanimo.” (San Juan, sa ika-6 nga kapitulo) Ug dunay miingon, “Karon, nagaingon Ka nga Imong . . . nakita si Abraham, ug usa man Ka ka tawo nga wala pa milagpas sa singkwenta anyos ang pangidaron?” (Tingali’g medyo tigulang na ang Iyang hitsura kumpara sa pangidaron Niya, pero Siya’y traynta’y anyos pa lang kaniadto, tungod man gud sa Iyang buluhaton.) Miingon, “Ang buot Mo bang ipasabot nga wala Ka pa milagpas sa singkwenta anyos, ug moingon Ka nga ‘nakakita na kang Abraham’? Kung ingon-ana nasayod kami nga Ikaw gayu’y buang-buang.” Kita n’yo?

Miingon Siya, “Sa wala pa si Abraham, MAO NA AKO.”

449 “MAO NA AKO,” Siya mao ang gamhanang MAO NA AKO. Ania Siya nga ginasultihan pag-usab kining mga Judio, kita n’yo, “MAO NA AKO! Ug kung makita ninyo Ako nga magaduol sa tuo sa gahum . . .” Husto ba kana?

450 Basaha gani pag-usab, igsoon. [Ginabasa ni Igsoong Neville ang Kasulatan—Ed.]

[. . .ug makita ninyo ang Anak sa tawo nga magalingkod sa tuo sa gahum, ug moanhi uban sa mga panganod sa langit.]

451 Basaha na karon ang anaa sa imo, Igsoong babayeng Wood. [Blangko nga bahin sa teyp. Nagaingon si Igsoong Wood, “Mga Taga-Efeso 1:20?”—Ed.] Oo, ma’am. [Ginabasa ni Igsoong Wood ang Kasulatan.]

[Nga iyang gibuhath diha kang Cristo, sa pagbanhaw kaniya gikan sa mga patay, ug nagpalingkod kaniya sa iyang tuo didto sa mga dapit nga langitnon.]

452 Sige, basaha na ang sa imo, igsoon. Kita n’yo, mao ra mismo Kini. [Ginabasa ni Igsoong babayeng Arnold ang Mga Buhat 7:55—Ed.]

[*Apan siya, nga puno sa Espiritu Santo, mitutok sa langit, ug nakita ang himaya sa Dios, ug si Jesus nga nagatindog sa tuo sa Dios,*]

453 Karon, nakita n'yo, si Je- . . .dili ingon nga adunay dakung tuo ang Dios, kita n'yo, ug nga nagatindog si Jesus sa Iyang tuo. Ang *tuong kamot* nagakahulogan og “pagbulot-an.” Kita n'yo? Pananglitan, unsa kaha kung—kung aduna ako'y bug-os nga pagbulot-an sa iglesia, o kaha usa ako ka obispo o ingon niana, ug mopuli sa ako si Igsoong Neville, siya ang mahimo kong tuong kamot. Kita n'yo, nagapasabot kana nga siya'y . . .maanaa siya sa akong tuo.

454 Bueno, si Jesus anaa sa tuo sa Gahum. Karon, mao kana'y ginaingon Niya, dinhi sa Mga Taga-Efeso, kaniadtong gisaysay niya kini, anaa Siya sa tuo sa Gahum. “Ang tanang kagahum sa Kalangitan ug yuta” (Miingon Siya, human sa Iyang pagkabanhaw) “gikahatag na nganhi sa Akong mga kamot. Anaa Kanako ang tanang kagahum sa Kalangitan ug sa yuta. Busa panglakaw kamo ug tudloi ang tanang kanasuran, og bautismohan sila sa Ngalan sa Amahan, ug Anak, Espiritu Santo, nga magatudlo kanila sa pagtuman sa tanang mga butang nga Akong gisugo kaninyo; ania karon, Ako magauban kaninyo sa kanunay, hangtud sa katapusan sa kalibutan.”

455 “Ang tanang kagahum sa Kalangitan ug yuta.” Asa na man ang. . .Kung aduna pa'y usa ka dios didto gawas Kaniya, nan wala na'y gahum kana nga dios. Kita n'yo, dili gyud mahimo nga dunay uban pa nga Dios. “Ang tanang kagahum sa Kalangitan ug yuta” anaa sa Iyang kamot. Busa, nakita n'yo, “Nagatindog Siya sa tuo,” (maingon sa gipangutana sa tawo), mao nga dili nagapasabot. . .

456 Karon matikdi n'yo, ang lawas. . .ang Dios Espiritu. Oo, pila man ang nakasabot niana? Moingon og, “Amen.” Ang Dios Espiritu, si Jesus Tawo, ug si Jesus mao ang Dios nga nahimong unod. Si Jesus mao'y . . .Dili nato makita ang Dios, kita n'yo, Siya'y Espiritu. Dili ninyo makita ang espiritu. “Walay pa gyu'y tawo nga nakakita sa Dios sukad-sukad.” Wala ma'y tawo nga makakita sa Dios.

457 Ug isulti ko kini, “Wala pa kamo nakakita kanako sukad-sukad.” Wala pa mo sukad nakakita kanako sa tibuok n'yong kinabuhi, ug dili gyud mo makakita kanako. Husto. Ang nakita n'yo kini man nga lawas nga mao'y nagapaila niining persona, nga ania sa sulod. Karon, kining lawasa walay Kinabuhing Eternal, apan ang espiritu ang dunay Kinabuhing Eternal. Kining lawasa magabalik sa yuta, apan banhawon kini sa kung unsa ang dagway niini, sama lang sa lugas sa trigo nga gipugas diha sa yuta. Ang Cristianismo nakabasi sa pagkabanhaw, dili sa pag-ilis. Pagkabanhaw; ang mao ra nga Jesus nga gilubong, mao ra gihapon nga Jesus ang nabanhaw. Kung ilubong ka nga pula

ang buhok, banhawon ka nga pula gihapon ang buhok; kung ilubong ka nga itum ang buhok, banhawon ka nga itum gihapon ang buhok. Kita n'yo, ingon-ana ang pagkabanhaw.

⁴⁵⁸ Pag nagakaon kamo . . . gipangutana ko kana sa doktor, dili pa lang dugay, ingon ko, “Ngano kaha kaniadtong dise-sais anyos pa lang ko . . . Sa matag higayon nga mokaon ko, daw sa ginabag-o ko ang akong kaugalingon?”

⁴⁵⁹ Miingon, “Husto kana.”

⁴⁶⁰ Nagaporma man gud kamo og bag-ong—bag-ong mga selula sa matag higayon nga mohimo kamo . . . ang—ang unod nagahimo . . . o ang pagkaon ang nagahimo og mga selula sa dugo, ug kana nga selula sa dugo ang nagapakusgan kaninyo. Sa ingon-anang paagi kamo mabuhi. Dayon, may butang nga kinahanglang mamatay pirmi, aron kamo mabuhi. Matag adlaw, adunay mamatay: kung nagakaon kamo og karne, nan mamatay ang baka; o kung unsa man ang inyong ginakaon; ug mamatay ang isda; o ang—o mamatay ang trigo, para mahimong tinapay; mamatay ang patatas, para mahimong pagkaon nga patatas; ug ang . . . tanang matang sa kinabuhi; mabuhi lamang kamo pinaagi sa patay nga mga butang.

⁴⁶¹ Ug mabuhi lamang kamo ngadto sa Walay Katapusan tungod aduna ma'y namatay: si Jesus. Dili tungod kay nagpamiyembro kamo sa iglesia, dili tungod kay nagpabautismo kamo, dili tungod kay nagapamahayag kamo nga Cristohanon; kondili tungod kay gidawat ninyo ang Kinabuhi ni Jesus Cristo nga nag-ula og dugo . . . Dugo nga giula alang kaninyo, ug gidawat n'yo Siya ingon nga inyong personal nga Manluluwas.

⁴⁶² Karon, matikdi, ipangutana ko kini. Gusto kong ipangutana kini sa *inyo*. Tan-awa n'yo kini, maanindot kini. Siguro natudlo ko na kini dinhi (dili na nako madumduman) kaniadto; nagawali ko sa bisan asa, mao nga makalimtan na nimo kung unsa ang mga nasugilon mo sa usa ka . . . usa ka lugar. Apan, nganong, ingon niana . . .

⁴⁶³ Karon, sa hunahuna ko, si Igsoong babayeng Smith . . . dili lang nako madumduman kung naila ko na kaniadto si Igsoong Fleeman o wala pa. Ug si Tryphena, mahinumduman ko siya niadtong gamay'ng bata pa siya. Mahinumduman pa ba ninyo, kaniadtong ako'y . . . gamay, mubo, medyo tambokon; itum, og kulong ang buhok. Nagaboksing ako kaniadto. Oh, abi ko niadto og hanas na kaayo ko. “Oh,” sa hunahuna ko, “walay makapildi sa ako. Wala, sir.” Pero ako—nalimbongan ra ko niadto, nakita n'yo. Pero ako . . . Bueno, sa hunahuna gud nako, “Oh, my.” Sa hunahuna ko, “Kung ibutang n'yo kana nga butang nganhi sa akong likod, mahimo nakong molakaw nga ginapas-an kana.” Oo, walay kabilinggan sa ako. Ug kada kaon nako kaniadto, nagakadaku ug nagakakusgan ako. Kada magbutang ko og bag-ong kinabuhi sa . . . nagakaon ko niadto og repolyo, mga

patatas, ug mga batong, ug karne, sama ra gihapon karon. Ug nagakakusgan ug nagakadaku gyud ko kaniadto. Ug sa dihang miabot na ko og baynte-singko . . .

⁴⁶⁴ Mas lami pa gani ang akong mga ginakaon karon kaysa kaniadto, nakaila man mo sa ako, kabalo mo niana. Mas lami na ang mga ginakaon nako karon, kitang tanan. Pero ngano kaha, Igsoong Eagen, nga ingon niana, ingon nga mas lamian na nga mga pagkaon ang ginakaon ko karon, mas daghan pa gani, mas daghan og bitamina ug tanan na . . . Pero imbis nga mas daghan na ang akong ginakaon, hinay-hinay man hinoon kong nagkaluya. Ug karon nagakatigulang na ko ug nagatikubo na ang akong mga abaga, nagkaupaw na, ug ubanon na, ug nagapangunot na ang mga kamot, namiyahok ang nawong, nanghuyhoy na ang mga abaga, ngani may buntag nga malisud mobangon, ug . . . Oh, grabe. Nganong ingon-ana man? Kung ginapalagsik ko ang akong kaugalingon kada kaon nako, nganong ingon-ana man?

⁴⁶⁵ Sama ra nga nagaipis ko og tubig gikan sa pitsel, ug mahimong katunga na lang ang kapun-on niana, ug dayon hinay-hinay na kanang mahurot imbis nga mapuno; ug bisan pa'g daghan ang akong ibubo, mas paspas pa hinoong mahurot. Ingon-ana. Ug dili n'yo kana mapamatud-an pinaagi sa siyensiya bisan pa kung kinahanglan ninyo. Kining Basahon lamang ang bugtong makapamatuod nga nagtagana gyud ang Dios; usa kini ka pagtagana, nakita sa Dios nga nagapaingon na kita.

⁴⁶⁶ Kamong tigulang na nga mga lalaki, ug kamong tigulang na nga mga babaye, tingali ang inyong—inyong mga bana ug ang inyong mga asawa mitaliwan na, pero dili kana—dili kana angay ng ikaguol. Alleluyah! Tungod anaa ra man sila sa luyo sa tabil, nagahulat, sa walay pagduhaduha, ug nangandoy sila nga makauban kamo pag-usab. Husto, gayud, nagandoy sila. Nangandoy sila nga makauban kamo pag-usab. Miingon ang Biblia nga sila, ang mga kalag nga anaa ilalum sa halaran nanagtuaw, “Ginoo, unsa pa ba ka dugay?” Kita n'yo? Wala pa man sila sa ilang husto nga kahimtang.

⁴⁶⁷ Wala kita gibuhat sa Dios nga mga Anghel, gibuhat Niya kita nga mga lalaki ug mga babaye. Kita sa kanunay mga lalaki ug mga babaye gayud, tungod kay usa—usa man kita ka produkto sa mismong kaalam sa Dios. Kita'y mga lalaki ug mga babaye sa kanunay.

⁴⁶⁸ Pero unsa man? Kita n'yo, tingali'g mahunahuna ninyo nga kaniadtong milakaw kamo paingon sa altar, ikaw ug ang imong bana, miingon nga dawaton nato ang usa'g usa nga mahimong legal nga magtiayon nga gikasal ug magkauban nga magkinabuhi sa balaan nga pakigsaad niining kaminyoon, ug ang mga grasya sa Dios ug uban pa, ug ang tanang testimonyo nga inyong gisulti, ug ang saad ninyo nga inyong gipanumpa.

Mahibaloan n'yo na lang, hinay-hinay n'yong mamatikdan, kamong duha. Tul-id pa kaniadto ang iyang pamarug, ug sinawon ang buhok; ug ang asawa nga ang matahum niyang, kaphion nga mga mata, o asul nga mga mata, o kung unsa man. Oh, gitutokan gyud nimo siya. Milakaw ka, og gitutokan nimo ang imong bana, "Kaniadto, tul-id pa ang mga abaga"; ug wala magdugay hinay-hinay na kanang mitikubo. Ang asawa sàb ubanon na, og motukar-tukar na ang arthritis ug uban pa. Ug wala magdugay, mitaliwan na ang asawa, o mitaliwan na ang bana.

469 Unsa man kana? Sa dihang nakita kamo sa Dios nga nagatindog dinha, miingon Siya, "Mao kana, ingon niana ang gusto Ko para kaninyo. Bueno. Kamatayon, sumulod ka, pero dili mo sila puedeng kuhaon hangtud nga motugot Ko kanimo."

470 Oh, oh, nahunahuna ko hinoon si Job. Oo, nagatan-aw ang Dios sa ubos, nasayod si Job nga gihigugma siya sa Dios. (Ug matikdi n'yo dili kamo mahimong kuhaon sa kaaway.) Ang ingon Niya, "Anaa na siya sa imong mga kamot, apan dili mo pagakuhaon ang iyang kinabuhi."

471 Ug mahibaloan n'yo na lang, hinay-hinay na nga motikubo ang mga abaga, ug dili magdugay motaliwan na kamo. Unsa ma'y nahitabo?

472 Bueno, sa pagkabanhaw wala na gyud ni usa ka butang nga magasimbolo sa kamatayon. Wala na'y usa ka butang nga magasimbolo niining yutaa, nga... Kita n'yo, nagakinabuhi kamo pinaagi sa kabubut-on sa Dios, aduna kamo'y kinabuhi. Dayon nagasulod ang kamatayon, og kuhaon kamo. Mao ra nga pagkaon ang ginakaon ug tanan na, mao ra nga klase sa tubig ang ginainom, tanan na; pero nagasulod gihapon ang kamatayon. Apan nakahan-ay na man ang hulagway. Alleluyah! Sa pagkabanhaw mabuhi gyud kamo pag-usab. Ug wala na'y kamatayon, o unsa man nga susama sa kamatayon, o pagkatigulang man, o pagkabakul o unsa pa man. Ingon nga wala na'y kamatayon, mamahimo kita nga sama na sa Iyang dagway, gihingpit na hangtud sa kahangturan. Alleluyah. Oh, ako... Makapasinggit gyud kana sa kang kinsa man, ilabina kung miabot na kamo sa pangidaron ko.

473 Ang akong pangidaron, siguro, kon inyong, palandongon, og ayo. Anaa na kamo sa kahimtang nga paingon na, nakita n'yo. Ang... Mosugod kamong maghunahuna, "Unsa ba kining tanan? Unsa ba'y nabuhat ko?" Namalandong ako, og nahunahuna ko, "My, grabe! Bueno, asa na ba kini paingon, Ginoo? Ania ako, kuwarenta'y-otso anyos na, duha ka tuig na lang, mokatunga na ko sa usa ka gatus. Whew! Igo ko lang... Tan-awa ang pipila pa lang ka mga kalag nga akong nakabig; ginatinguha ko nga mangkabig pa og minilyon ug minilyon." Dios, tabangi ako.

474 Maulaw gani ako sa akong kaugalingon kon mouli ako aron magbakasyon. Mahunahuna ko, “Oh, hinog na ang anihonon, pero diyutay ra ang mga mamumuo. Minilyon nga anaa sa kasalanan ug kaulawan naghimalatyon na matag adlaw, paminawa ang ilang pagtuaw.” Sa paghigda ko inig magabii madungog ko silang makaluluoy nga mga pagano nga nagatuaw didto sa halayong dapit. Linibo gayud ang ilang ka daghan, nagapangita kanako, ug—ug atua sila sa airport kon diin adunay mga sundalo didto para babagan sila, nga unta atua ra man sila didto aron lang mapatalinghugan ang sugilanon mahitungod kang Jesus Cristo.

475 Pero dinhi mohangyo pa kita, ug magpahibalo pa sa mantalaan ug tanan na, ug moabang og pinakamaayo nga mga lugar aron mapalingkod ang mga tawo, kinahanglan maanindot kaayo ang panglingaw nga may maanindot nga panag-awit, motambong man sila ug, “*Ahhh!* Bueno, maayo man siguro kana, pero dili man gud kana sakop sa akong pagtulon-an.”

476 Oh, my, unsa—unsa—unsa pa ba ka dugay kini molungtad? Dili na . . . dili na gyud husto. Ug ngani dinhi ginalabay ra nato ang gatusan ka binilyon nga mga tonelada sa pagkaon nganha sa basurahan, samtang sila nga mga tawo didto malipay gayud unta nga modawat niini. Ug sila’y mga linalang man usab dinhi sa yuta sama kanato. Pagkasubo, kita n’yo . . . Bueno, dili na gyud mahimo nga modugay pa ang ingon niana nga taras.

477 Bueno, karon, Kinsa ba ang Amahan? Ang Amahan ug ang Anak Usa ra. Matikdi, sa Unang Juan 5:7, miingon Kini, “Adunay tulo nga nagapamatuod sa Langit, ang Amahan, ang Pulong (nga mao ang Anak) . . . Amahan, Anak, ug Espiritu Santo: kining tulo Usa ra.”

478 “Adunay tulo nga nagapamatuod sa yuta, mao ang tubig, dugo, ug Espiritu.” Mao kana ang tulo ka elemento nga migula gikan sa lawas ni Cristo. Gidughang nila ang Iyang kilid: migawas ang tubig, migawas ang Dugo, “Sa Imong mga kamot ginatugyan Ko ang Akong Espiritu.” Mao kana, mao kana ang tulo ka elemento. Kining tulo dili usa ra, kondili *nagakahiusa* kini.

479 Amahan, Anak, ug Espiritu Santo; Unang Juan 5:7, nagaingon, “Kining tulo Usa ra.”

480 “Ang tubig, dugo, ug Espiritu *nagakahiusa*.” Dili Usa ra, kondili *nagakahiusa*. Busa ang Amahan . . . Ug ang bugtong butang nga mahimo sa lawas, nga makita sa Dios ang Iyang Kaugalingon, nga tungod sa silot nga giagian niini nga lawas, adunay nangaliya . . . nangaliya dinha mismo, nakita n’yo. Mao kana ang higayon nga makita Niya ang Dugo nga nagapataliwala Kaniya ug sa paghukom. Ania ang Iyang Pulong, miingon, “Sa adlaw nga kamo mokaon niini, kana nga adlaw

kamo mamatay.” Ug dinhi miingon si Jesus, “Ako . . . Apan Ako ang mipuli kanila. Kita n’yo, Ako ang mipuli kanila.”

⁴⁸¹ Nahinumduman n’yo ba kadtong akong estorya niadtong miaging gabii kon diin nakita ko ang panan-awon mahitungod sa babaye nga grabe ang kahimtang nga atua sa lawak didto? Ug gikondena ko siya, ingon ko, “Dios, nganong dili na lang Nimo pabuthon kining lugara?” Dayon may gipakita Siya *kanako*, kita n’yo. Ug miduol ko ngadto sa babaye ug gisulti kaniya kung unsa ang nahitabo.

Karon, mao na kini ang ulahing pangutana.

64. Sa hunahuna mo, sumala sa mga Kasulatan, ang mga Judio . . . modawat ba kang Cristo sa dili pa ang Pagsakgaw sa Iglesia?

⁴⁸² Ako—ako—nagatoo gyud ako nga ang Pagsakgaw sa Iglesia . . . Kaugalingon kong opinyon kini, kita n’yo. Ug kung aduna pa kita’y oras, atong tun-an kini og ayo, pero ang—ang oras pasado alas nuebe na man gud. Ania, nagatoo ko nga dawaton sa mga Judio si Cristo sa Iyang ikaduhang Paganhi. Karon hinumdumi n’yo, aron nga mahibaloan sa tawong nangutana, nga gibutahan ang atong mga mata, o, gibutahan ang ilang mga mata aron kita makakita. Nasayod man ang si bisan kinsa, nga ang mga Kasulatan nagahisgot mahitungod niana. Husto ba? Gisultihan kita ni Pablo nga ang atong . . . nga kita gibutahan . . . nga ang mga Judio gibutahan aron nga madawat nato si Cristo. Kita n’yo? Ug kita mao ang ihalas nga olivo nga gisumbak ngadto sa kahoy pinaagi sa pagsagop.

⁴⁸³ Karon ania ang opinyon ko, hatagan ko lang kamo . . . Ang pangutana man gud nila sa ako, “Sa hunahuna mo ba . . . ?” Karon ingon niini ang sa hunahuna ko nga mahitabo. Wala ko kabalo. Kung unsa man gani, sigurado ko nga pinaagi sa grasya sa Dios ug sa Iyang kalooy, mamaatua kita didto; kita n’yo, pinaagi sa Iyang grasya, kung unsa man kana. Tingali’g dili ko kini maisaysay og ayo, pero ania kung unsay akong ginahunahuna. Nagatoo ko nga ania na kita sa katapusang panahon. Nagatoo ko nga ang kapanahonan sa Gentil patapos na karon. Nagatoo ko nga haduol na kita.

⁴⁸⁴ Ug karon ang mga Judio; ania ang duha ka butang nga sayup sa mga Judio sa kanunay: Nabutahan sila, dili sila makakita; ug tungod nga ang mga Gentil, para sa usa ka butang, sa makadaghang higayon . . .

⁴⁸⁵ Nahinabi ko ang usa ka Judio didto sa Benton Harbor, Igsoong babayeng Smith, ug kabalo ba ka kung unsay gisulti niya sa ako? Didto kono sa usa sa Israel . . . sa mga lugar didto sa Israel. Kini nga pangutana mahitungod sa pagkaayo sa usa ka buta nga lalaki. Ug ingon siya, “Dili mo mahimong putlon ang mga Judio sa . . . Dili mo mahimong putlon ang Dios sa tulo ka bahin ug ihatag Siya sa usa ka Judio; himoon Siya nga Amahan,

Anak, ug Espiritu Santo.” Miingon, “Dili mo mahimo kana sa usa ka Judio, dili kami nagasimba og mga dios-dios.” Ingon pa, “Nagatoo kami sa *usa* ra ka Dios.” Kita n’yo?

⁴⁸⁶ Unya himoon n’yo ang Dios nga tulo: Dios nga Amahan, Dios nga Anak, ug Dios nga Espiritu Santo; sigurado gayud nga buta kamo sa usa ka Judio, tungod mas nasayod siya. Mas nasayod gyud siya. Magpahinungdan lang kana nga mahimo kamong nagasimba og mga dios-dios tungod ingon niana mismo ang pagsimba og mga dios-dios, duna kamo’y tulo ka dios. Kinahanglan n’yong himoon kana nga mao ra nga Dios, dili nga tulo ka dios, kondili tulo ka opisina sa mao ra nga Dios. Kita n’yo, ang Dios nag-alagad diha sa pagka-Amahan, nag-alagad Siya diha sa pagka-Anak, ug karon nagalaagad Siya sa dispensasyon sa Espiritu Santo. Kini’y mao ra nga Dios.

⁴⁸⁷ Mao kana’y hinungdan nga gisugo kita nga magbautismo sa Ngalan sa Amahan, Anak, Espiritu Santo; tungod kay, dili sa ngalan sa usa ka . . . Sa *Ngalan*, dili mga ngalan; dili sa mga ngalan, o sa ngalan sa Amahan, sa ngalan sa Anak, sa ngalan sa Espiritu Santo; kondili “sa Ngalan sa Amahan, Anak, ug Espiritu Santo.” Kita n’yo, nga ginaila nga ang mao ra nga Dios mao si Cristo. Kita n’yo, mao kana Siya mismo, wala na’y lain pa. Kita n’yo? Ug ang Kasulatan . . .

⁴⁸⁸ Ug—ug kung sayup man ang atong kapadayagan, kung ingon-ana si Pedro ug ang tanang uban pa sa mga apostoles nagtudlo diay og sayup; tungod kay ang matag tawo sa Biblia nabautismohan man sa Ngalan ni Ginoong Jesus Cristo. Wala ni usa ka tawo kaniadto ang gikabautismohan sa “Amahan, Anak, Espiritu Santo,” doktrina kana sa Katoliko. Mapamatud-an ko kana sa inyo pinaagi sa ila mismong mga pulong, ug sa kaugalingon nilang mga lexicon ug tanan na. Usa kana ka kredo sa Katoliko ug dili usa ka—ug dili usa ka doktrina sa Biblia. Ug walay si kinsa man . . .

⁴⁸⁹ Bisan ang Hari sa Inglatera gikabautismohan usab sa Ngalan ni Jesus Cristo. Mga unom ka gatus ka tuig human sa pagkamatay sa kaulahiang apostoles, kaniadtong dili pa Inglatera ang ngalan sa maong nasud, ang ngalan pa niini kaniadto “Yuta sa Manulonda.” Dinha man gikan, ang ngalan niana. Ang maong hari gikabautismohan sa Ngalan ni Jesus Cristo.

⁴⁹⁰ Ang nakapakabig sa iyaha, mao’y tungod sa usa ka gamay’ng maya. Kaniadtong . . . Sa nahinumduman ko, dili si Saint Angelo. Unsa gani ngalan, niadto? Si Agabus, Saint Agabus, nagatoo ko nga mao kana, dili lang ko sigurado sa ngalan, mismo. Pero, bisan pa man, miadto siya didto, ug aduna sila didto’y pipila ka mga . . .

⁴⁹¹ Ang tawag nila sa ilaha mga manulonda tungod kay, ang mga tawo ug ang mga taga-Assyria ug uban pa itum og pamanit,

ug kining mga Ingles aduna ma'y tag-as, puti, kulong, bulagaw nga buhok, mga Anglo-Saxon, kabalo mo, asul ang mata. Ug ang ingon nila, "Mora sila og mga Anghel," ug mao nga gitawag nila kadto nga "Yuta sa Anghel."

⁴⁹² Ug ang—ang alagad sa Ginoo miadto didto ug nagwali sa ilang hari, ug nagalingkod sila dapit sa usa daku, halapad nga daobanan. Gibasa man gud nako ang kasaysayan niana dili pa lang dugay. Ug may usa ka langgam nga milupad ngadto sa suga ug migawas, ug nangutana ang hari, "Hain kaha siya gikan ug hain man siya miadto?" Kita n'yo? "Miduol siya nganha sa kahayag, ug nakita nato siya, ug mibalik siya sa kangitngit. Dili ba ingon niana man usab ang tawo?" ingon niya.

⁴⁹³ "Pero unsa man siya sa wala pa siya misulod dinhi?" ingon ang magwawali, kita n'yo. Kadto ang miigo sa hari; ug pagkasunod buntag, siya ug ang iyang panimalay nagpabautismo sa Ngalan ni Jesus Cristo. Tinuod kana.

⁴⁹⁴ Dayon unsa man? Ang unang tawo nga giwisik-wisikan o gikabautismohan sa ubang paagi nga sa ngalan sa "Amahan, Anak, Espiritu Santo," maoy sulod sa iglesiang Katoliko. Ang unang pagwisik-wisik nga nahitabo, maoy sulod sa iglesiang Katoliko. Ang unang pagbubo nga nahitabo, sa iglesiang Katoliko gihapon. Ang iglesiang Protestante kanunay man nagabautismo . . . sa Biblia, ang mga apostoles, mao'y pinaagi sa pagtuslob sa Ngalan ni Jesus Cristo. Sa tanang dapit. Pangita mo og usa ka dapit kon diin lahi ang ilang gibuhay, kita n'yo.

⁴⁹⁵ Karon, sa niining, niining halangdong panahon, ang mga Judio dili pa makahimo . . . Gipangutana ko kadtong rabbi, ingon ko, "Rabbi, malisud ba para sa imo nga toohan ang mga propeta?"

⁴⁹⁶ Ingon siya, "Nagatoo ko sa mga propeta."

⁴⁹⁷ Ingon ko, "Sa Isaias 9:6, unsa ma'y buot niyang ipasabot sa, 'Alang kanato ang usa ka Anak natawo'? Kinsa ma'y iyang ginapahinungdan miadto?"

⁴⁹⁸ Ingon siya, "Nagapahinungod siya sa Mesias."

⁴⁹⁹ Ingon ko, "Kung ingon-ana igapanganak diay ang Mesias?"

⁵⁰⁰ "Oo, igapanganak Siya."

⁵⁰¹ Ingon ko, "Kung igapanganak Siya, nan aduna Siya'y . . . magkaaduna Siya og inahan."

⁵⁰² "Oo, kinahanglan aduna Siya'y inahan. Ug kinahanglan nga aduna Siya'y amahan, usab," ingon niya.

⁵⁰³ Ingon ko, "Mao gayud. Ug malisud ba para sa imo nga toohan nga kana'y mamahimong dili . . . nga ang Dios nga Gamhanang Jehovah Nga mao'y nagpabuka sa Dagat nga Mapula, dili mahimong magpahimugso niini nga Bata pinaagi sa putli nga pagkahimugso?" Kita n'yo? Mao kana.

504 Ingon siya, “Apan dili mo man puedeng himoon Siya nga tulo ka dios.”

505 Ingon ko, “Dili Siya tulo ka dios.” Ingon ko, “Unsay relasyon sa Mesias ngadto sa Dios?”

506 Ingon siya, “Siya ang mamahimong Dios.”

507 Ingon ko, “Bueno nasabtan gyud nimo. Karon nasabtan gyud nimo, nga Siya’y Dios.” Eksakto gayud.

508 Dayon ginasulti niya sa ako, ingon, “Bueno, kini nga tawo usa ka kawatan, kining Jesus nga taga-Nazaret. Usa siya ka kawatan.”

509 Ingon ko, “Rabbi, giunsa man Niya pagkahimong usa ka kawatan?”

510 “Bueno,” ingon siya, “nagaingon ang inyo mismong mga kasulatan nga ‘Miadto Siya sa umahan sa mais sa adlaw sa Sabbath, ug mikuha og mais.’”

511 Ingon ko, “Bueno, rabbi, mas nasayod gyud ka... mas nasayod ka mahitungod sa Kasulatan. Nagaingon ang kaugalingon n’yong kasulatan nga legal kadto, ‘Uyon man sa balaod nga ang usa ka tawo moadto ug mokaon og ingon ka daghang mais nga gustohon niya, pero dili niya puedeng isulod sa sako ug dalhon kini.’ Ang kaugalingon n’yong balaod, sa rabbi.”

512 Ug mihunong siya didto sa makadiyut, siya—siya—mitoo siya niini, tungod kay siya—siya nagpamatuod man. Ingon siya, pagkataudaud niadto, ingon siya, “Bueno, unsa—unsa ma’y naghinungdan nga ang mga mata ni Juan...” Ingon, “Unsaon mo man pagbuhat kana?”

513 Ingon ko, “Sa Ngalan ni Jesus Cristo.”

514 “Uh.” Siya—wala siya mahibalo; miingon, “Bueno, dili mo mahimong putlon ang Dios sa tulo ka bahin.”

515 Ingon ko, “Siya mao man si Jehovah nga nadayag sa unod, Rabbi. Siya... Ingon niana Siya, Siya mao si Jehovah nga anaa sa unod. Ang Kaugalingon Niyang tawhanong ngalan, kadto ang Ngalan sa pagtubos, kay walay laing ngalan nga gikahatag ilalum sa Langit nga ang tawo maluwas, kondili pinaagi lamang nianang tawhanong Ngalan sa pagtubos: ang Ginoong Jesus Cristo. Husto. Siya’y Dios, Siya’y Dios, Siya’y Dios hangtud sa kahangturan, mao gayud, si Ginoong Jesus Cristo.”

516 Karon, nagatoo ko nga ang iglesiang Gentil hapit na... ang pagkumpleto sa lawas sa iglesiang Gentil. Ang mga pultahan tali sa... miingon si Jesus, sa Mateo 24, (hisgotan ko lang kanang usa ka Kasulatan sa makadiyut), miingon Siya, “Ilang pagatamakan ang mga kuta sa Jerusalem hangtud nga matapos na ang panahon sa Gentil.”

517 Karon matikdi. Gisulti kana sa atong Ginoong Jesus, diha sa Mateo 24, nga ang mga Judio pagakuhaon sa esena. Miingon si Daniel, kaniadto didto sa mga karaang propeta, ingon siya nga adunay setenta ka semana nga gikatagana, alang sa mga Judio. Ug moabot ang Mesias (ang Principe) ug magapropesiya sa taliwala sa ika-setenta ka semana, nga pito ka tuig, og pagapatyon Siya sa taliwala. Matikdi n'yo kung unsa ka hingpit kana, nagwali si Jesus sa eksaktong tulo ka tuig ug tunga ug gilansang. Apan adunay tulo...Lakip kana sa niining usa pa ka pangutana dinhi. Aduna pa'y tulo-ka-tuig-ug-tunga ang gikatagana alang kanila, alang sa mga Judio. Sigurado gayud.

518 Karon kung inyong basahon ang Pinadayag, sa ika-7 nga kapitulo, nakita ni Juan ang usa ka gatus ug kap-atan ug upat ka libo nga mga Judio nga tanan giselyohan, gikan sa dose ka banay sa Israel. Nasabtan n'yo ba ang buot kong ipasabot? Pero adisir kana, mahitabo úna ang pag-anhi.

519 Karon tan-awa n'yo kung unsa ka maanindot kini, sa dili pa kita magtapos karon. Matikdi n'yo kung unsa—kung unsa nga nagapamuhat kini. Karon, gingitngitan kadto nga mga Judio.

520 Bueno, kining mga Judio dinhi, halos tanan kanila dinhi, mao'y...kabalo na man mo kung unsa sila, sila ang nagkupot sa bandi sa kalibutan. Ug sila gayu'y—gayu'y mga tawong kuwartahan, ug mao lang kana ang masulti mo bahin sa ilaha, kita n'yo; ug mga mapahitas-on kaayo, ug walay pagtagad, ug dili manalinghug. Pero, dili man ang mga ingon-ana ang Iyang ginapahinungdan, kung mamatikdan ninyo.

521 Karon, ang mga Gentil...Karon matikdi n'yo, duna pa'y nahibilin nga tulo-ka-tuig-ug-tunga alang sa mga Judio. Bueno, miingon si Jesus nga ang siyudad sa Jerusalem pagatamakan sa mga Gentil hangtud nga ang dispensasyon sa Gentil... (Karon, kamo nga mga dili nagatoo sa mga dispensasyon, unsa man kana?)...Hangtud nga matapos ang panahon sa Gentil. Ug pag natapos na ang dispensasyon sa Gentil (natapos na ang panahon sa mga Gentil), nianang higayona ang siyudad igabalik na ngadto sa mga Judio. Ug nagpadayon si Jesus sa pagsulti nga ang kaliwatan...Miingon, “Pag mogawas kamo ug makita n'yo ang kahoy'ng higuera nga nagapanalingsing na, ug ang tanang uban pa nga kahoy nagapanalingsing,” miingon, “kabalo na mo nga ang ting-init haduol na.” Ingon pa, “Ingon man usab nga pag makita ninyo kining mga butanga nga nagakahitabo na, hingsayran ninyo nga ang panahon haduol na, anaa na sa pultahan; ug sa pagkamatuod nagaingon ako kaninyo nga dili mahanaw kining henerasyon hangtud nga kining mga butanga matuman.”

522 Bueno, nagpaabot sila niadtong henerasyon, “Mao kono kadto ang Iyang ginahisgotan.” Dili gayud!

523 Paminaw mo! Siya miingon, “Ang henerasyon nga nakakita sa kahoy’g higuera nga nagapanalingsing.” Karon matikdi, miingon Siya, “Ang kahoy’ng higuera, ug ang tanang uban pa nga mga kahoy.” Bueno, sa laing pagkasulti, “Magkaaduna og pangtibuok-kalibutan nga rebaybal nianang panahona.” Karon matikdi n’yo kini nga propesiya, kung sa unsang paagi kini mahitabo ug hingpit gayud nga nagatakdo. Karon matikdi. “Ang tanang uban pa nga mga kahoy magapanalingsing, mabuhi pag-usab.” Ang usa ka kahoy, pag nagapanalingsing kini, nagakabuhi kana pag-usab. Husto ba? Karon, nasayod ang si kinsa man, ang magtutudlo og propesiya, nga ang kahoy’ng higuera sa una pa mao ang Judio. Nasayod kita niana. Ang Judio kana. Karon ang. . .

524 Ug matikdi n’yo si Joel, sa dihang naghigot siya niini, ingon siya, “Kung unsay gibiyaan sa ulod nga dangaw-dangaw, gikaon sa ulod nga hantatawo; kung unsay gibiyaan sa ulod nga hantatawo, gikaon sa dulon; ug kung unsay gikaon sa dulon. . .” Kung mamatikdan ninyo, mao ra kana mismo nga insekto, anaa lang sa nagkalainlaing mga hugna: ang dangaw-dangaw, ang hantatawo, ang dulon. Mao ra kana nga insekto, managlahi lang ang hugna sa kinabuhi niini. Karon matikdi, kanang mao ra nga insekto hinay-hinay nga gikaon kaniadto kining Judiong punoan, gibangag-bangagan kini, ug hinay-hinay nga gikaon ug gikaon ug gikaon ug gikaon hangtud nga nahimong usa na lang ka tuud; apan ang ingon niya, “Akong ipasig-uli,’ nagaingon ang Ginoo, ‘ang tanang mga tuig nga gikaon sa ulod nga hantatawo. Ug himoon Ko nga managkalipay ang Akong katawohan.” Kita n’yo? Karon, gikaon na ang maong punoan. Ang mga Gentil gisumbak diha niini, tinuod kana. Bueno, mao nga kinahanglan natong mamunga.

525 Bueno pag moabot na ang katapusang panahon, pag modangat na kita sa katapusan (kung husto ang tan-aw ko niini), ang Ebanghelyo: adunay gipaabot nga dakung rebaybal nga mahitabo.

526 Bueno, kabalo ba mo nga ang bandila sa Judio mao ang pinaka-karaang bandila sa kalibutan? Ug wala na kana napakayab-kayab sulod sa duha ka libo ka tuig, basin sobra pa, mga baynte-singko ka gatus ka tuig. Ang bandila sa Judio, kanang bitoon ni David nga may unom-ka-tumoy, wala na napakayab-kayab sulod sa baynte-singko ka gatus ka tuig; sukad niadtong gidala sila sa—sa Babilonia. Ug karon, tungod kay gisakop sila sa Imperyong Romano (ug miabot ang Mesias ug gisalikway nila Kini), ug nangapatlaag sila ngadto sa upat ka hangin sa yuta. Apan kabalo ba mo, nga niadtong ika-sais sa Mayo, 1946, gipakayab-kayab pag-usab kana nga bandila didto ibabaw sa Jerusalem? Kabalo ba mo, nga niadtong ika-pito sa Mayo, 1946, ang Manulonda sa Ginoo nagpakita kanako (pagkasunod adlaw niadto) dinhi, ug gipaadto ako sa tibuok

kalibutan aron maghatud og rebaybal? Niadtong pagkasunod buntag mismo! Kaniadtong gipataas kana nga bandila didto sa Jerusalem, samtang nagasalop ang adlaw niadtong hapon, ang Manulonda sa Ginoo nagpakita pud dinhi sa Estados Unidos niadtong higayona. “Pag makita ninyo ang kahoy’ng higuera ug ang tanang uban pa nga kahoy nga nagapanalingsing!”

⁵²⁷ Pila man ang nakahinumdom niadtong Bitoon nga atua nagpaibabaw didto sa Ohio River, daghang mga tuig na ang milabay, kaniadtong miingon Siya...Ania gani dinhi ang retrato Niadto, kaniadtong mikunsad Siya. Miingon, “Ang imong Mensahe igapahayag ingon nga mag-uuna para sa ikaduhang Pag-abot, sama ni Juan kaniadto nga gipadala ingon nga mag-uuna para sa unang Pag-abot.” Ug, tan-awa n’yo, sa tibuok kalibutan mikaylap ang maong rebaybal. Napulo ka linibo-libolibo ka pilo, ug usa ka dakung rebaybal.

⁵²⁸ Ang tanang mga legalista, ug tanan nang nagkadaiya nga mga tawo sa tibuok nasud, ug ang dagkung mga kasimbahanan miingon, “Tapos na ang Billy Sunday nga mga adlaw.” Apan sa dihang nakita nila nga misugod na nga nabuhi pag-usab ang iglesia (ang mga ordinaryo nga tawo), kinahanglan aduna sila’y buhaton aron dili maulawan. Si Charles Fuller man unta ang mipuli, pero tigulang na man kaayo siya; mao nga miadto sila kang Billy Graham. Ug gipili sa Dios si Billy Graham, o, gipili sa iglesiang Baptist, ug misunod silang tanan kaniya. Ug si Billy Graham wala ra gani mikatunga sa pagka-magwawali ni Igsoong Neville, kon hisgotan lang ang pagka-magwawali, wala...wala, wala gayud. Apan unsa man kadto? Kinahanglan nilang buhaton kadto, usa kadto ka organismo, ug ang tanan misunod niadtong, og nanagkatigum. Mao mismo ang giingon ni Billy. Kita n’yo, gikinahanglan nilang buhaton kadto. Ug angay ra pud nga nahitabo kadto aron matuman ang Pulong sa Dios. Wala man kanila ang Espiritu aron makapatigum og dinaghan, busa gigamit nila ang Pulong aron mapahigayon kana; mao kana ang gibuhat nila. Ug si Billy usa man ka magwawali sa Pulong, ug maayo pud, ug misuporta sila; busa mao kadto ang nagpadani sa tanang mabugnaw nga mga pormal nga makigtigum kanila. Ug ang supernatural nga Persona, nga may dalang Balaanong pagpang-ayo, ug mga gahum ug mga pagpamuhat ug uban pa, pinaagi sa mga milagro sa Dios, gipahimutang kining...ang Iglesia, ang gisakgaw nga Pangasaw-onon nga adunay Lana sa Iyang lampara, gipahimutang Siya sa usa ka rebaybal. Kita n’yo? Ug ang mabughaw’ng pormal nga iglesia aduna pu’y rebaybal. Ug ania pud ang Israel nga nagabalik sa ilang rebaybal.

⁵²⁹ Ngani adunay salida nga atua sa akong balay karon, *Three Minutes To Midnight*. Ug aduna pud kami og retrato bahin sa mga Judio nga nagapanguli na. Nagapanguli na; nakita na ninyo kadto sa *Look* magasin. Ug ang mga barko, puno gayud, nga gikan pa sa Iran ug didtong dapita; silang mga Judio wala

gyud nasayod nga mianhi na si Jesus dinhi sa yuta kaniadto, og nahiadto sila og nahimong mga binihag didto sa Babilonia. Mao lang kadto ang nahibaloan nila. Nanagdarro sila . . . nakita man ninyo kadto sa *Look* magasin o sa *Life* ug mga ingon-ana, kon diin nanagdarro sila gamit ang karaang mga kahoy nga pangdarro. Ug sa dihang nakita nila kadtong mga eroplano nga nagaabot, nahunahuna nila, “Mao na kini,” kay gisultihan man sila sa Dios nga “mahiadto sila didto, ug dalhon sila pabalik sa Jerusalem pinaagi sa mga pako sa agila.” Husto kana. Mao kadto. Ug miingon ang Judio, “Mao na kini.” Misakay sila didto, ug aduna kita’y mga hulagway og sa tingog nila mismo, ug gihinabi sila; nga gikan pa sa tibuok kalibutan. Ang uban gani kanila gipas-an pa ang ilang mga katigulangan, ug silang mga buta ug mga bakul. Ug nanaug na sila sa mga barko nga gikan pa sa nagkalainlaing mga bahin sa kalibutan, nga nakauli na.

⁵³⁰ Ug nanagsugod sila panguha og mga bato ug gisulod sa mga sako, gikan sa yuta; ug karon nakakaplag sila og mga tuboran sa tubig, og mao na’y pinakamaayo, og pinakamauswagon nga nasud sa tibuok kalibutan sa agrikultura. Anaa sa Dead Sea ang mas daghan nga mga bahandi kaysa tanang uban pa sa kalibutan. Nagapamalik na ang Judio; nalilong kini sa mga Gentil, pero nagapamulak na gayud sila sama sa usa ka rosa.

⁵³¹ Miingon sila ngadto kanila—kanila nga mga Judio, ingon sila, “Nagapamalik kamo sa inyong kaugalingong-yuta para didto na mamatay.”

⁵³² Miingon, “Namalik na kami aron makita ang Mesias. Hain na man Siya? Dapat ania na Siya dinhi.”

⁵³³ Igsoon, pag makita ninyo ang kahoy’ng higuera nga nagapanalingsing na, ingon Siya, “Dili mahanaw kining kaliwatana hangtud nga matuman ang tanan.” Tan-awa n’yo ang rebaybal sa mga pormal. Tan-awa n’yo ang rebaybal sa Iglesia. Tan-awa n’yo ang rebaybal nga paingon na sa mga Judio, nagahulat gyud sila sa pag-abot sa Mesias. Ang Iglesia, ang puno-sa-Espiritu nga Iglesia, ang Pangasaw-onon uban ang . . . ang mga dalagang ulay nga may lana sa ilang mga lampara mangadto na sa pang-Kasal nga Panihapon.

⁵³⁴ Moingon ang mga Judio, “Mao na Kini. Ania na ang among Dios nga dugay na namong ginahulat.” Mao kana ang usa ka gatus ug kuwarantay-kuwatro ka libo . . . nga gikalibogan sa mga Russellite. Mao kana ang mga Judio nga atua na didto para dawaton Siya. Ingon sila, “Mao kana ang among Dios nga among ginahulat.” Makita nila Siya, og moingon, “Asa Mo man nakuha ang mga niana? Asa Mo man nakuha ang mga uwat sa Imong kamot?”

⁵³⁵ Miingon Siya, “Nakuha Ko ang mga niini sa balay sa Akong mga higala.” Husto, “Sa balay sa Akong mga higala.”

536 Unsa ma'y buhaton Niya? Ang Iglesiang Gentil pagasakgawon paingon sa Himaya ug ang Pangasaw-onon igapakasal na kang Cristo.

537 Giunsa man ni Joseph pagpaila ang iyang kaugalingon ngadto sa iyang mga kabanay? Gipahawa niya ang matag Gentil gikan sa iyang atubangan. Mao gayud ang gibuhat niya. Unsa na ma'y mahitabo sa mga nahibilin nga binhi sa babaye? Mibuga og tubig ang dragon gikan sa iyang baba aron makiggubat; miingon si Jesus, "igatambog sila ngadto sa kangitngitan sa gawas, ug adunay paghilak ug pagdanguyngoy ug pagkagut sa mga ngipon," mao kana ang makuyaw nga takna sa pagpanglutos ug mga pagsulay nga magaabot sa iglesiang Gentil.

538 Unsa na ma'y mahitabo pagkahuman? Pag mahitabo na ang pagpang-martir, pag napahimulag na sa Dios ang tanan gikan sa mga Judio didto, mobalik na si Jesus sama sa pagbalik ni Joseph. Pagkadungog nila kang Joseph, sa dihang gipagawas niya ang tanan niyang mga tigbantay ug tanan nang uban pa, ug nakita niya ang batang si Benjamin ug sila nga nagatindog didto, ug nanagbasol gayud sila tungod sa pagpatay kang Joseph. Abi man gud nila nga napatay nila si Joseph, pero ania siya nga nagatindog sa ilang atubangan. Ingon siya, "Ako si Joseph. Ako ang inyong igsoon."

539 Dayon nangurog gayud sila, "Siya diay si Joseph. Karon naila na nato siya."

540 Sa dihang moingon na Siya, "Ako si Jesus. Ako ang Mesias."

541 Moingon sila, "Oh, my, unsa kaha'y mahiaguman nato!"

542 Pero gipahinabo kadtong tanan alang sa kahimayaan sa Dios. Dili Siya. . . Bueno, nadungog man nila siya nga nagahilak didto sa palasyo ni Faraon, si Joseph nga nagahilak para kanila.

543 Hulata lang ninyo pag makita na ni Jesus kadtong mga Judio nga gikinahanglan Niyang butahan kaniadto aron kita nga mga Gentil magkaaduna og kahigayonan nga makasulod, grabe gayud kana nga takna, ginasulti ko kaninyo. Pagadawaton Niya kadto nga mga Judio, ayaw kamo'g kabalaka, pagaluwason Niya silang mga Judio. Oo, sir, maanaa gyud sila didto. Ug mao kana ang akong ideya bahin niana, dili ko makita diha sa Kasulatan nga maanaa sila sa asang uban pang lugar. Kinahanglan n'yong ipapabilin nga nahiusa kining tulo, usab.

544 Kinahanglan n'yong makita ang—ang nagakatulog nga mga ulay, ang—ang ordinaryo nga iglesia, ang mga nagapamahayag lang, kita n'yo. Kinahanglan n'yong makita ang iglesia. . . Bueno, ang Judio una, ang Judio una, nga tawong gibutahan nga nagahulat diha sa daplin. Kinahanglan n'yong makita ang sunod nga ang—ang, nga mao ang nagakatulog nga ulay, nga naglangay—langay, ug nagaadto ug nagasimba, ug nagpamiyembro sa iglesia, ug maayo nga tawo. Dayon kinahanglan n'yong makita ang Iglesia, ang espirituwal, ang Pagasakgawon, ang Pangasaw—

onon, ingon nga ana siya dinha. Kanang tulo ka tawo, dili n'yo puedeng. . . dili puede nga magkasagol sila, bisan gamay. Dili man sila pareho. Dili sama sa ginaingon sa Jehovah Witness, “ang usa ka gatus ug kuwarentay-kuwatro ka libo mao ang Pangasaw-onon”; sayup kana. Ang mga Judio man kana, kita n'yo. Adunay Pangasaw-onon, dunay mga Judio, ug ang nagakatulog nga ulay. Ug angay nga makita n'yo silang tanan, ug moingon, “Bueno, kining tulo anaa sa nagkalainlaing mga bahin.” Silang tanan, tulo ka nagkalainlain nga matang sa mga tawo. Oo, dili sila puedeng mahiusa.

⁵⁴⁵ Dayon sa pagbalik ni Jesus nganhi sa yuta. . . Ang mga Judio, unsa man sila? Ang mga eunoco sa templo. Ug sa pagbalik ni Jesus, moanhi Siya nga *kauban* na ang Pangasaw-onon. Nagaanhi si Jesus sa tulo ka higayon: Siya mianhi na sa unang higayon aron *tuboson* ang Iyang Iglesia, moanhi Siya sa ikaduhang higayon aron *dawaton* ang Iyang Iglesia, moanhi Siya sa ikatulong higayon nga *kauban* na ang Iyang Iglesia. Kita n'yo? Eksakto. Busa kining tanan usa ka mahimayaon og hingpit nga pag-anhi, usa kini ka gamhanang hingpit nga Dios; usa kini ka gamhanang hingpit nga Cristo; usa ka gamhanang hingpit nga Iglesia, usa ka mahimayaong hingpit nga pagtubos. . . ang tanan; anaa sa trinidad, pero kining tanan anaa sa Usa ra. Kita n'yo? Dili kini tulo ka tawo, dili tulo ka *ingon niini*; kondili usa lang kini ka Persona, usa ka Iglesia, usa ka Lawas, usa ka Cristo, usa ka Ginoo “nga anaa sa inyong tanan, ug pinaagi sa inyong tanan,” ug mora'g ingon niana. Usa ra tanan!

⁵⁴⁶ Panalanginan kamo sa Ginoo. Napalangan ko gyud kamo og ayo.

⁵⁴⁷ Kon itugot sa Ginoo, karon, kung makabalik man ako sulod sa pipila ka gabii, o usa ka Dominggo sa gabii o mora'g ingon niana, kung ang pastor dinhi wala pa'y masulti gikan sa iyang kasingkasing, paningkamotan kong tubagon ang mga niini dinhi. Oh, adunay pipila dinhi nga mga maanindot. Pila man ang gustong makadungog niini? Oh, gusto ko gayud ang mga niini. Basahon ko ang mga niini pag-usab, sa ingon ka paspas, sa dili pa nato ibalik ang panerbisyo ngadto sa pastor.

⁵⁴⁸ Paminawa lang ninyo kini:

Asa ba ang mga bato ginarep-...? Unsa ba ang ginarepresentar sa mga bato diha sa Pinadayag, 21?
Maanindot kini.

Isaysay ang upat ka mga mananap diha sa Pinadayag 5. Ania ang maanindot pud.

Si kinsa ba ang kaluhaan ug upat ka mga anciano?
Maanindot pud kini, kita n'yo.

Unsa ba ang buot ipasabot sa pula nga tanod diha sa Genesis 38? Nahinumduman n'yo ba, nag-adto siya ug gikuha ang iya mismong umagad-nga-babaye ug miipon kaniya ingon

kini nga usa ka bigaon; ug gituman ang bili ug milakaw na; ug pagkahuman sa nahimugso na ang bata, nagbutang sila og tanod nga pula palibot sa kamot sa bata (gigawas man gud sa bata ang iyang kamot ug gibalik kadto sa sulod), ang—ang usa ka kaluha ang migawas adisir siya. Oh, maanindot kini; mao gayud.

Unsa ba ang mga gasa nga igapadala pag namatay na ang duha ka mga saksi, sa Pinadayag 11? Mao kana ang panahon nga mobalik si Moises ug si Elias alang sa rebaybal para niining usa ka gatus ug kuwarentay-kuwatro ka libo. **Unsa ba ang mga gasa?** Matikdi n'yo kung unsa ang mga niini, maanindot gyud.

Asa man mahiadto ang mga balaan human sa usa-ka-libo-ka-tuig'... (maanindot gyud kini, grabe. Nga...)... **paghari? Unsa man nga matang sa lawas ang ilang mabatonan?**

Sa unsa mang paagi nato pagahukman ang mga manulonda?

Ngano man nga buhok ang ginapahinungod sa mga manulonda diha sa Unang Mga Taga-Corinto? Diha sa Basahon sa Unang Mga Taga-Corinto. Pipila kini sa mga maanindot, maanindot gayud.


⁵⁴⁹ Panalanginan kamo sa Ginoo. Nagalaum ko nga itugot sa Ginoo nga magkatigum kita ug hisgotan kining mga butanga, alang kining tanan sa Iyang kahimayaan. Tingali'g dili kita magkauyon sa mga ideya bahin niini; apan isulti ko ang usa ka butang, kung ingon gayud kamo ka nalipay sa pagpaminaw sa mga niini sama sa akong kalipay sa paghisgot mahitungod sa mga niini, magkaaduna gyud kita og maanindot nga higayon. Amen. Amen.

⁵⁵⁰ Bueno, magmaayo gayud ang Ginoo sa inyo karon. Ayaw n'yo kalimti ang mga buluhaton. Ang pagpasibya ni Igsoong Neville, karon, sa WLRP kana, sa Sabado sa buntag sa alas nuebe; ang Neville quartet, ug sigurado ko nga maayo gyud ang mahimo niana kaninyo, atangi ninyo ug paminawa sila. Ug kung mahimo nako, kung makabalik ako sa tukma nga oras, o tan-awon ko kung makabalik ba ko dayon, tawagan ra nako ang akong asawa; kung itugot man sa Ginoo nga makaadto ako para duawon ang minahal nga si Igsoong Bosworth. Ako... Kamong tanan... ug mobalik ko sa Dominggo sa gabii.

⁵⁵¹ Malooy gayud ang Ginoo sa inyo karon. Ug igsoon, pastor, duol sa ngari kadali; ug ibalik na nato sa iyaha ang panerbisyo. Ug:

Don't forget the family prayer,
 Jesus wants to meet you there;
 He will take your every care,
 Oh, don't forget the family prayer.

⁵⁵² Gusto ba ninyo kana? Pila man sa inyo ang nagaampo sa ilang panimalay? Atong tan-awon, ang tanan...tanangyud...Maayo kana, magpadayon kamo nga haduol sa Dios. Magbinuotan kamo, mga anak, panalanginan kamo sa Dios.

Sige, Igsoong Neville. 

57-1002 Mga Pangutana Ug Mga Tubag Mga Hebreohanon Bahin II
Branham Tabernacle
Jeffersonville, Indiana U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org